

上海縣志卷之十

人物

名臣

獨行

文苑

隱逸

流寓

藝術

列女

仙釋

王者君萬國子萬民一日二日萬幾繫良股肱是賴然廉平守職無所短長者衆矣若夫清風亮節彰著朝野上倚以重下托以安雖崇卑中外有殊焉其功在社稷一也故首名臣於是宣風導流停澆激薄自士君子以至委巷細民奮其孝義廉節之性爲史策光君子於以觀風俗焉次獨行爾乃文章之士山林之叟含咀六經

上海縣志

卷之十

一名臣

畋漁百氏或歌咏太平或抗情肥遯不容以語嘿軒輊之次文苑隱逸而且類聚羣分聞聲而來樂土一術以行箕裘賓至如歸小道可觀也次流寓又次藝術他如婦人女子蒙化被澤知天不可移節不可奪茹藥捐軀始終一致與殺身成仁者何多讓蓋德化之成也故次列女至于仙釋二家漢唐流毒非宜訓世然舊志所存亦不敢逸姑存一二以俟能言距楊墨者作人

物志





名臣

宋一人

錢良臣字友魏幼力學舉紹興中進士淳熙五年拜  
叅知政事立朝德望偉然縣學皆良臣所葺也

元二人

費察字子壽長興人徙嘉興再遷上海宋末以策干  
兩淮制置使補進勇副尉權提舉上海市舶元初  
授武德將軍金牌千戶遷宣武將軍兼鎮守上海  
總管府事沿海民船無所統或流入盜賊察請錄  
上海縣志

卷之十

二 名臣

爲戶蠲其徭役而官領之可得海船數千稍水數  
萬備國用乃賜虎符授明威將軍管領海船萬戶  
踰年遷懷遠大將軍遙授浙東宣慰使卒贈江夏  
郡公謚榮敏察器局寬整倜儻而篤厚賓禮名士  
尤輕財樂施人呼爲費佛子稅司重估苛取察請  
用三十稅一之法不足則補以私錢戊子大水計  
口賦鹽察日飭粥不給何有于鹽先以鈔輸官徐  
取鹽付列肆又酒課不均察請以田業爲斷貧下  
戶悉除之鄰境牒惡民相仇殺將獮薙之察建議



招收從征日本使自贖數千人得不死卒之日人  
爲罷市往哭至相與爲佛事以報之子拱辰武德  
將軍平江等處運糧萬戶縣初建學拱辰捐貲經  
理之孫雄亦知名有祖父風

任仁發字子明號月山世居青龍之東幼穎異好學  
年十八應宋鄉試入選元初游平章見而器之辟  
宣慰掾授青龍木陸巡警官會征交趾改海船上  
千戶是年浙西淫潦建言河沙滙乃吳淞咽喉不  
先此而他濬固效大臣不納後果溷塞大德七年

上海縣志

卷之十

三名臣

重濬平章開黑起仁發董其事疏濬凡七十餘里  
一畚鍤之役井然有條進都水監丞至大間大都通  
惠河及會通河梗澁檄仁發治之不兼旬報竣河  
決汴梁溢入歸德府仁發結籩篠鳳掃實河口築  
隄五百餘里以扞橫流水不爲害至治二年鹽官  
海激岸崩鎮江練湖淤積命治之泰定改元詔  
賜銀幣與行省朶班左丞部六郡夫疏導吳淞二  
道大盈烏泥二河事竣加江陰尹特任都水庸田  
一使司副使計剗石閘六築塍圍八千浚溝千有奇



太湖衆水東入於海所至具有績效以中憲大夫  
浙東道宣慰使司副使致仕年七十三卒所著水  
利書具存尤工詩善畫有熙春天馬二圖詔藏祕  
監

明 七十九人

全思誠字希賢博學能詩文仕本郡學正洪武十六  
年以耆儒徵授文華殿大學士兼左中允勅曰卿  
懷才抱德志肩古人惜乎年迫衰暮志雖存而力  
不能任朕不忍復勞特授此職以輔導太子免卿

上海縣志

卷之十

四 各臣

早朝日晏而入不久當從其志思誠固辭許致仕

按思誠詩學盛唐王梧溪輩俱尊之爲耆宿時  
傳其問疾詩有千年松下得琥珀萬壑雨餘生  
薜蘿有客饋魚供野饌何人擊竹和樵歌能脫  
窠臼又云長吟不盡相思意矯首霜前一雁過  
殊有遠致又有送黃璋就試禮部詩云嗔雀灘  
前凍雨收賓筵載味鹿呦呦右文天子春秋富  
勸駕諸侯禮數優日下五雲生北闕天邊一鶚  
起南州遙知人射丹墀策象管翩翩思不休

王思由人材洪武三十三年令永春縣性聰敏勤于  
吏事蠲稅糧均徭役嘗奏革額辦段疋民至今德  
之

夏長文洪武時以人材舉拜監察御史劾堂官右都



御史袁泰違法擢左僉都御史

杜隰字宗原祁國十一世孫祖元芳元德清簿父希仲水軍萬戶俱有文名隰好學持正非聖賢之書不讀非其人不交洪武初中詞科爲太常贊禮郎時麓川平緬未下議遣使宣諭而難其人<sub>有以隰名聞者</sub>召對授旨賜襲衣囊藥力士重譯爲介以行至詰其不庭卒以其人人貢上嘉獎授禮科給事中<sub>以疾辭歸</sub>凡兩賜手書存問卒年三十三所著有雙清集十卷紀行詩一卷第桓善論時事亦

上海縣志

卷之十

五名臣

能詩有九峰一叟稿

何廣字公遠博學多識以明經爲江西令尋擢御史遷陝西按察副使精于律學時變亂成法者當大辟法家因仍一切有所改易輒以傳議廣日嘻若是則大辟者踵接矣此但爲改定律令者言之蓋禁於所不犯也大學士解縉覽而是之及卒禮部主事俞允狀其行日居鄉里則稱學者任郡邑則爲循吏在風憲有澄清志位藩垣得大臣體時以爲實錄所著有律解辨疑行於世



夏禮字公立洪武中貢入太學拜監察御史有直聲  
明太祖爲開其軍伍嘗上疏劾勲貴忤旨出爲知  
縣奏減各處均輸商稅從之永樂初以薦爲御史  
陞河南副使謫戍武清文皇北巡再召爲御史使  
至南京值閘壩水溢漂毀民廬亟令有司疏洩上  
聞而是之復以薦爲陝西副使積歲疑獄一言而  
決以兩艱去陝西數千人詣闕借留奪情還任卒  
於官

黃恭字孟莊永樂庚子舉人釋褐除刑部主事廉公  
上海縣志 卷之十 六 名臣  
不苛出知贛州府有惠政以父喪去贛民如失怙  
恃服除改守黎平適苗獠叛朝廷命將征討恭以  
漢龔遂對宣帝語啟總戎請往招撫乃單騎入賊  
營賊感泣羅拜全活數十萬以功食三品俸歷九  
載卒于官其子彥宏博學倜儻有父風

葉宗行讀書尙氣節永樂中東吳大水松江尤甚宗  
行上書請濬范家浜引浦水以歸于海上善其言  
命從夏尙書原吉治之水患果息原吉還薦其才  
擢知錢唐縣宗行爲定役法俾民自占甲乙書於



冊循次而呼之役遂以均詞訟亦藺不逾年翕然  
稱治一日廳事前有蛇蜿蜒若有所訴宗行諭之  
曰若有寃乎吾爲汝驗之蛇返入餅肆中爐下發  
之得屍乃肆主利其財殺之埋此遂伏法縣故多  
虎暴宗行爲文祭之虎遂斂跡仁宗在東宮聞其  
治行戒所司善視之按察使周新風采嚴峻嘗伺  
宗行出潛至其署發笥惟笠澤銀魚乾一封新嘆  
息携少許而去明日召之食曰此君家物也飲之  
至醉出三品儀從導之歸宗行辭不許曰此位可  
上海縣志

卷之十

七 名臣

立至奚辭爲時呼爲錢唐一葉清奉公事入京道  
病卒新痛悼累日自爲文以祭之云惟錢唐之山  
水與公萬古而俱清至今稱爲循吏云

陳質字文彬永樂甲辰進士拜御史風操凜然論事  
斷獄雖權貴不能屈嘗參靖遠伯王驥軍事多謀  
畧以山東叅政致仕居官四十年清謹如一日家  
居杜絕請托親舊不敢干以私卒年七十五  
許進永樂中同知韶州府甫到官輒出俸倡修學校  
除害興利予畜其民終明世倅郡者以進爲宥



李伯璵字君美宣德丙午舉人歷桐廬山陰秀水安  
福四縣學官先是桐廬累舉缺人伯璵至識姚文  
敏公夔于少年曰一夔足矣授春秋未幾夔擢第  
山陰學或傳山陰不利科目請徙之伯璵曰顧師  
弟子教學何如耳卒不徙後仕者相繼稍遷淮府  
長史從王入覲左右請他求伯璵不可曰君臣之  
間有賜無求求則瀆瀆則不敬府使人入貢與一  
縣令爭道詔下令于獄而釋使者不問伯璵請治  
之以戒生事官校有犯王械寘於市伯璵請論如

上海縣志

卷之十

人名臣

律王有疾左右請施僧祈福伯璵謂不若貸丁役  
錢以甦衛士從之卒年六十八著文翰類選一百  
六十三卷行于世子澄清進士澄字希范終福  
建左叅議恬靜有守不競榮利有古人風清字希  
憲終湖廣右布政狷介有志操始終清謹官南京  
刑部時除母喪謁尚書姚夔以其父舊思欲留之  
謝曰知者謂公自薦不知者謂清有所干也姚嘆  
曰希憲真君子第八子淡字希達少有雋才讀書  
通音律淮王愛之疏請納爲儀賓太后特召入京



賜婚中外榮之

蔣性中字用和宣德丁未進士有司舉故事爲立表於門時鸞竇湖病涉久性中曰榮吾家曷若利吾鄉卽移所費爲石梁於湖上除兵科給事中清介自持上疏劾巨璫王振請節闡寺錦衣諸冗食以養驍勇常奉使過家駕小艇令村僕二人挽之性中坐舟尾持櫓觸行舟舟人以篙擊中笠更呵罵之僕厲聲曰此蔣給事也性中叱曰奴輩欺人此處那得蔣給事促牽船徑去出爲江西參議有惠

上海縣志

卷之十

九名臣

政以疾乞致仕章四上乃許歸家躬耕養母杜門不出巡撫周文襄忱每往謁性中設蔬食款論竟日終不報謁一日邑令往候及門見有蓑笠從田間歸者不顧竟入頃之束帶出迎卽所見蓑笠人也其古朴類如此

張衡字允平宣德間授御史上澄清風紀疏忤旨謫戍遼東竟卒戍所嘗詒書于孫穀曰本以名義經心不顧利害日望汝成立慰我冥冥吳文定公寬陸文裕公淡有贊表其風節



唐瑜字廷美景泰辛未進士拜南京禮科給事中出守衢州先教後刑衢人大悅會歲旱且疫瑜自爲文禱于神雨大作沴疫亦消後凡禱輒應吏民相與勒石於周宣靈王廟衢有孔子祭田爲豪家所奪瑜以俸贖還俾世其祀孔氏孫圖瑜像于家廟生祠之民有李延者爲媒而匿婚家聘金鬻二子及妻以償瑜曰民窮而犯法畏法而棄妻子守之過也贖而歸之龍游張福晟吳氏四人而諉其事于金氏旣誣服矣瑜別置於獄廉得其實釋金而

上海縣志

卷之十

十名臣

罪福民以爲神及去民立祠祀焉及叅政湖廣襄河爲害作隄障之置廣儲倉歲饑發賑民賴以濟尋遷山西布政改雲南定土官世襲法及給散滇糧事宜俱有條貫大臣屢薦未果用或勸之宜少降志瑜正色曰我一介寒士至此復何求久之擢都御史巡撫甘肅會詔使諷織細羅充貢瑜執不從又黜弁田廣等陰搆之坐劾去弘治五年詔復其官致仕卒衢民間喪奔哭者累月不絕云郁文博以字行景泰甲戌進士擢御史有直聲歷湖



廣副使撫蠻寇活三十萬衆居官清介一錢尺帛不妄取妻子衣敝緼飯脫粟晏如也嘗有老蒼頭夜侍忽泣語曰主翁寧能常在官中耶家計日落奈何不爲子孫地文博艱然曰余如貞婦苦守垂白矣爾欲污我令我後不得爲清白吏子孫耶提矛擲之清操益勵

談倫字本彝天順丁丑進士長身豐頤瑩然玉立時鹽山王忠肅爲冢宰風岸孤峭意輕南士見倫瞿然曰南方有此人耶授驗封主事轉員外郎郎中

上海縣志

卷之十

十一名臣

忠肅每入見輒以倫隨上問之公以名對曰臣老矣于聖諭恐有遺忘此郎代臣志之且其人可信也上因欲大用之忠肅謂年少資淺他日用之未晚丁母憂服除補虞衡司擢應天府丞是年鳳陽大水守者匿不以聞倫自署其奏詔免秋糧數萬進尹應天改順天尋拜工部右侍郎會南昌人李孜省以左道得幸而萬文康在內閣有憾于冢宰尹某因孜省媒孽以成其獄士出尹門下及山東鄉故盡逐之尹出都無敢送者倫獨往餞成化初



致省伏誅謫逐者多召還而倫以病不起初倫家居歲遣人起居尹于山東祀王忠肅于別室及尹沒亦如之時稱其淳厚今吾鄉所行談箋倫家遺製也子田少治舉子業不遇乃弃去好吟咏不甚求工起大第構園亭花木泉石之勝甲一郡四方紳士過之必留連觴咏瀕行餽遺有古俠士風槩云

王霽字景明天順庚辰進士初授南京刑部主事歷郎中出守黃州州多虎時有火災又江水嘗暴至上海縣志

卷之十

十一 名臣

壞民廬舍霽祈祝輒應民愛信之遷廣西叅政未幾遷江西按察使進太僕寺卿條奏馬政十事報可用薦巡撫山東值歲饑霽區畫銀五十餘萬兩米二百餘萬石賑之存活甚衆召拜大理卿用法平易弘治元年卒賜祭葬子泰自有傳

顧英字孟育號草堂天順己卯舉人授廣西同知有民楊姓兄弟爭產各以百金賂英英佯許之比庭詢問若所爭幾何弟白兄匿五十金英曰若爭五十金乃以百金求勝乎顧吏出其賂分償之兩



媿服尋改延安會兵荒民多逋負英移文所司乞以舊糧量改輕齎候完俸支折色民賴其惠歲饑先發倉賑濟後詣監司謝罪上官嘉獎之後守廣南屬車里仇殺宣慰板雅氏者死嫡庶爭立英乃冒險行千里卒定其事致仕歸構南溪草堂賦詩自娛又出田十餘頃爲義庄以贍宗族卒祀鄉賢孫定芳最知名有傳

戴春字景元弟曦字景暉同受業周廷參門下景泰庚午應鄉試令侯某戲曰兄弟俱讀書科舉誰充

上海縣志

卷之十

十三名臣

役者果捷當爲建聯桂坊及同領鄉薦令爲建坊天順甲申成進士歷官順慶知府卒曦學優才敏外坦內嚴授中書舍人遷刑部員外郎卒於官

高祐字天錫本王氏父鉉贅于高因從其姓成化丙午以鄉貢授泉州同知泉多山谿民倚險爲梗祐訓以德義皆相率從化積逋不督而集凶年出粟貸民念山鄉險遠總授而分給之遠邇稱便嘗道漳州宿山間有負豪家債而憤其逼者聚衆期旦日殺豪豪亦陰爲備祐外之遣人諭以禍福片言



而散一日令所部市茶其人密置銀二錠以進祐  
笑却之屏其人弗復接丁父憂歸部民千餘人携  
金錢跪贖皆不受歷廣平東昌二府操履如一晚  
居邑西四壁蕭然不以介意時鄉人作三婦說喻  
士大夫獨目祐爲節婦云

周洪字廷誥成化戊戌進士除蒲圻令勸農力田植  
桑麻令婦女業紡績治絲枲驗其勤惰而賞罰之  
高田置筒車下隰剝陂堰民賴饒給鄉置社學市  
田三十畝令生徒父母合力耕稼復其徭爲教讀  
上海縣志

卷之十

古名臣

資邑有奸法者大署木牌于門雖權勢不避置立  
義倉六所儲穀三萬石正德初大旱民猶賴之拜  
御史卒蒲人誦德不衰云

張黼字仕欽成化丁未進士官刑部郎中有里姬訟  
其子不孝者反覆開譬且呼其母爲子理髮皆感  
泣悔服去每有疑獄必焚香祝天至忘寢食以求  
其情久之子鳴鳳以御史官南臺一日值御史騶  
哄於道鳴鳳下馬立他御史疾馳去乃嘆曰吾老  
矣安得復與兒子輩爭衡哉卽日疏乞致仕上嘉



其恬退進應天府丞歸卒年七十八初黼年五十未第或勸廢學黼曰人雖休吾弗休古人有之請事斯語卒成其志又以晚成父母不及祿養刻親像自隨垂老言及必流涕士林稱爲篤行

瞿霆字啓東號南山成化庚子舉人授順天府判奉詔同給事中李漢等清理武清七廠葦地繪圖進呈勒石著令尋遷左府經歷調後府出知廣南府俄轉沅江那氏與族人相仇殺往撫諭之那氏陰行千金爲賂霆發其奸獻議誅之隨乞休東還作上海縣志

卷之十

五名臣

七老會圖畫賦詩以爲盛事年八十九卒有南山集

董恬字世良綸子也弘治丙辰進士授工部主事分司徐州改刑部員外郎轉郎中有族子三人毆殺其叔母恬謂法當敘服制輕重司寇擬以同罪果爲大理所反奉勅錄囚浙江平反明慎時逆瑾干政凡復命者必往謁恬不往復無所遺乃撫以逾限罰米二百石餉邊正德戊辰晉大理少卿癸酉賜章服閒居卒年七十四



唐錦字士綱弘治丙辰進士時修會典擇進士有才望者入史館錦與焉會典成乞歸侍養已而出就東明令比河患不息建言者奏開賈魯河下北直河南山東漕運四撫臣議錦謂賈魯河久爲平陸且延袤數百里非費鉅萬無成功元以開河致亂此非細故不若隨地隄備卽間有害無他虞撫臣籍其議以聞役遂寢入爲兵科給事中清理廣東鹽法查核積逋百餘萬引所司侵盜者寘之法餘悉蠲除之時劉瑾殘橫錦不謁饋謫判濱州瑾誅

晉南繕部轉比部郎凡淹繫可矜者力奏出之竟任無一滯獄再督江西學政遇宸濠之變集城中士民激以大義捕得守城內官杜茂僞千戶朱真輩四十二人奪其鎖鑰馳請虔撫王守仁入城建首功坐所部民兵夜亂落職後事白許致仕杜門養重銳情著述一時金石之文皆出其手卒年八十所著有龍江集夢餘錄大名上海二志行于世曹閔字崇孝弘治丙辰進士授沙縣知縣入爲南御史正德初上疏極論劉瑾下錦衣獄被杖幾死瑾



敗起廣西僉事閔曰一瑾去而衆瑾尙在遂引退  
年未五十也爲人篤實恬靜足跡不入城市養母  
十年母終廬墓得寒疾卒

沈恩字仁甫弘治丙辰進士初授刑部主事忤劉瑾  
落職瑾敗復起歷官雲南按察使前使者謁黔國  
公拜伏隅坐甚恭恩不爲屈旋按其不法事問遣  
奴輩二十餘人黔國怒陰令市肆告變以危恩監  
司上其事廷議竟右恩擢四川布政廉知蜀民苦  
邊糧料價前後奏減二百餘萬兩時新都相柄國

上海縣志

卷之十

十七 名臣

蒼頭稍驕橫恩輒寘之法新都遺恩大紅絨二且  
謝不謹恩召集僚屬焚于廷新都子廷對擢第一  
人賀者爭致重幣恩出俸三兩佐兩蜀杷爲餽新  
都不爲禮恩亟走人索歸卒以此坐免居鄉屏謝  
竿牘對郡縣語尤規切嘗徒行數十里送其師朱  
暉之喪其歿也貧不能殮今祀鄉賢巡撫都御史  
夏邦謨又特爲之祠

張鳴鳳字世祥黼子與弟鳴鸞同年舉於鄉丙辰成  
進士令永康以廉能召爲南御史上疏論劉瑾被



逮廷杖瑾誅詔復原官仕終湖廣副使

張萱字德暉弘治壬戌進士除鄱陽令改嵯縣復改政和擢守茶陵州民悍黠多盜不可詰捕乃類編族氏嚴立株坐之法四境清肅又隣邑永新民越境占田歲負稅三百餘石萱白其狀上官責永新吏督徵以紓民累內艱服除改潞州會武宗西巡權幸請張訛言欲刷婦女一州洶沸將竄匿山谷萱請以身當之民倚以安歷官湖廣叅議致仕歸萱外寬內嚴所至有風績茶陵人爲著循良傳楚之象別有傳

上海縣志

卷之十

名臣

臬某畫其像以志思慕人以方何武焉子鳴謙孫唐懽字季和號只山弘治壬戌進士官刑部孝宗崩懽哭之慟不御酒肉者累日正德初逆瑾竊國懽獨以直節守官瑾心銜之乃誣以他事下詔獄其黨張文冕懽同郡人使人邀重賂營抹懽曰我實無罪寃當雪若有罪則法在朝廷安敢倖脫遂謫穀城令士大夫咸餞別之賦詩奕棋談笑自若單車至縣見餓莩於路輒悲嘆不食以爲長民之責



未幾卒於官年三十七是年八月瑾誅人以懼不及見爲恨然無有上其事於朝復其官者

陸澐字子淵號儼山幼有大志人以公輔期之弘治辛酉舉應天鄉試第一乙丑成進士官翰林時承平無事朝士留心翰墨名雋繼起澐詩文與李空同徐迪功爭衡書法李北海趙松雪其品鳴古今賞鑒書畫談鋒洒然一座盡傾由編修擢國子司業丁母憂去官旣釋服不樂赴補廷臣交章薦之起祭酒充講筵故事講章先從內閣刪竄澐講畢

上海縣志

卷之十

九 名臣

面奏今日講章非臣原撰乞自今容講臣得盡其愚上可之退復上疏極言講官宜令自盡獻納以杜壅蔽當路忌之謫延平府同知遷山西提學副使時晉府有優人子入學澐聞之曰可使學宮缺一人不可以一人污學校竟斥之又陽曲生父爲縣令所笞下獄死訴御史趙趙反抵生罪澐爭之不能得卽疏劾趙趙亦劾澐有旨差勘澐得直旋補浙江副使仍理學政歷四川左布政徵拜光祿卿預修玉牒改太常卿兼侍讀學士扈駕承天命



濂掌行在翰林院印御筆刪侍讀二字嚴嵩贈濂  
詩有行朝特視詞林篆御筆親題學士名後致仕  
一日上問侍臣陸濂張邦奇才學孰優侍臣以陸  
優於張對上曰陸濂曾爲祭酒桂萼欲害之今尙  
在否方有意召用會卒賜祭葬贈禮部右侍郎謚  
文裕遺文凡一百卷子楫字思豫少穎敏讀書過  
目不忘屬文援筆立就年未四十卒人共惜之所  
著有兼葭堂稿文裕以孫鄉賢嗣楫後官石阡守  
王泰字時陽大理卿霽子弘治己未進士以刑部主  
上海縣志

卷之十

二十 各臣

事理漕淮陽弛軍士淹禁者百人去淮之日籍公  
帑若干緡築石隄數百丈以防湖漲遷主客員外  
郎時逆瑾專政賞賜屬國多紊舊例泰上疏復之  
擢太常丞出爲江西叅議值饒信姚源盜起都御  
史俞諫檄泰軍前督餉倚其力用俘獲男女具訪  
鄉里親戚還之事竣賜白金文綺先是柄兵者議  
撫東鄉賊渠授以冠帶泰不可主議者疾之遂謝  
事歸泰嫡長應得父大理卿廕不以屬子而讓庶  
弟尤人所難



張憲字時震弘治壬子舉人官南安司理又倅廣州俱有廉惠稱

葉鈇字廷用弘治辛酉舉人授福州府同知甫下車有二十四人上謁自稱汎商各饋海錯一罌發視皆白金也鈇大駭封識而密察之皆海洋劇盜卽詣臺使白其狀請得便宜除賊乃伏甲內廨延汎商入飲席終伏發群賊就縛得通番劫殺諸不法事上之臺使悉殲之出罌金貯公帑賊黨駭散閩海始安尋擢刑部員外郎晉郎中以論事忤權貴

上海縣志

卷之十

三  
名臣

出知雲南臨安府多惠政移疾告歸卒

趙綸字廷言正德庚辰進士爲內江令有善政有民利其從子財手刃七人而誣爲盜所殺綸片言折服衆驚嘆以爲神蜀素無雪是歲雪盈寸又蝗不入境粟一莖五穗士民刻石稱三異終南京刑部主事

戴恩字子充正德辛未進士授工部主事累官陝西叅議恩外恬和內機警初視權武林歲歉多負課恩曰吾寧以是獲戾不能效培克吏也御史王堯



封特爲奏免武宗南巡郡縣吏往往弃印逃譴恩獨與總理河道御史龔弘經理供億市肆不擾以勞瘁邁疾乞歸時年五十有三

朱豹字子文父曜以貢授清江提舉愿慤端毅時人比之陳太丘豹舉正德丁丑進士當除官曜戒之曰我生平慕包孝肅之爲人若爲官不持一研歸乃吾子也豹受命惟謹所至有冰蘖聲令奉化豪右凜凜奉法振飭庠序捐俸建社學調知餘姚革里甲短解之弊至今遵其法兩邑皆祠名宦擢御

上海縣志

卷之十

三 名臣

史益以直道自任薦楊一清伍文定及召對豹又密陳災異禪聖政十事言極剴切奉勅清理江西軍務江西白宸濠變後災盜數起豹至發粟活數萬人釋大辟囚三十餘人又嘗請兩京五品以上官各舉郡守舉不稱者坐之語多忤時遷守福州聞父訃卽日徒跣行三十里僚屬士民送者遮道豹性孝友父存日未嘗乘車與昆季處履相易而敝宗黨多待以舉火所著有福州集父曜有玉洲

集俱行世



潘恩字子仁號笠江嘉靖癸未進士知祁州調劇禹州州人相語曰母相仇避潘侯母甚口媿太守積儲爲列城最會歲稔發倉貸之擢南京刑部員外郎遷廣西僉事督學政時靖江王驕勒其衛卒子母充諸生卽充者必以賄恩移文長史欲糾之諸生乃得就試嘗署按察篆勾捕王所匿大猾王銜之上疏誣恩上遣法曹會勘事得直進四川左叅議歷浙江叅政按部海鹽島寇猝至圍之數十匝時城無見兵但鼓舞吏人晝夜登陴不少懈城卒

上海縣志

卷之十

名臣

以全進雲南按察使擢江西布政使巡撫河南徽恭王子載瑜嘗輕去其國多掠良家子充後宮占民田賊殺無辜十百事恩與御史悉發其罪狀論廢徙遷刑部侍郎再擢南京工部尚書時督餉都御史章渙嘗有疏經畧中原名觸上諱將坐以誅謫又雲南巡撫游居敬與黔國相觝沐陰中之坐以激變恩上疏救解皆得比寬典改左都御史疏請飭臺綱別吏弊詔嘉納之乞致仕聽許年八十七卒賜祭葬贈太子少保謚恭定子允哲允端俱



成進士自有傳

劉兆元字德資嘉靖乙酉舉人閉戶讀書兼通兵法風角占候謁選授懷慶司理嘗慮囚一女子繫獄已二十年兆元察其寃出之武陟富人以女字巨室婿家後貧規欲離絕兆元責令歸之而疑富家多婢或有詐乃訪一隣姬曾識女面者驗之果偽兆元怒欲按籍其家竟得成婚尋病歸至淮陰卒杜時騰字冲之嘉靖戊午舉人就教石埭時文廟忽發異香瑞芝產于泮池未幾子宗彝從子獻璠孫

上海縣志

卷之十

名臣

士全俱登賢書後遷黃縣令出寃繫二人于獄尋罷歸黃人攀號送之時騰出一詩留別父老曰三年休養力一旦別離情稅事須先足苗田宜早耕身家忍處保衣食儉中盈回首雲山隔飄然兩袖輕年八十餘猶作蠅頭楷書無疾而終

蔡懋昭字允德嘉靖庚子舉人由嘉善教諭擢知新河縣遷守趙州州有大橋稅歲入千金例供官署懋昭分償積逋載會計冊冢宰胡松稱其賢擬內召而太守陳燁齷齪之拂衣歸適有御史顏思賢



過趙父老泣訴治狀及去官之故顏薦之朝卽家  
起桂陽州旋同知懷慶遭父喪去官補肇慶時海  
酋餘黨許恩者築城陽江沙島東連惠州林道乾  
爲犄角勢懋昭用間離其黨示以恩信恩降卽入  
坐恩幄呼恩解散部曲凡六千餘人急隳其城率  
恩入謁制府婉請赦之道乾旣失援亦詣軍門降  
遷思州知府城故無井民間汲水二三十里外懋  
昭令四門各穿一井肅衣冠拜禱水旋涌出民稱  
爲蔡公井及致仕歸思民肖像祀之歷官幾二十

上海縣志

卷之十

名臣

年環堵蕭然至不能舉火卒年九十

張鸚翼字習之嘉靖辛丑進士以兵部主事出守山  
海關創新令數條改吏部酌選法疏淹滯鄉里無  
所借後巡撫貴州復區畫撫彝四事上之皆見嘉  
納以星變免歸會倭寇上海民無固志首建築城  
飭備團兵三議又出粟廩登陴者城賴以全病亟  
猶口占答郡守論民瘼書引已疾爲喻所著有須  
野集易說辨訛孫泰階萬曆己未進士歷官溫處  
道



龔情字善甫嘉靖癸丑進士由行人擢禮科給事中時南北警報劾午情條疏邊防四事復封駁移取太倉銀兩詔書詞旨愷切以會勘伊庶人不法事忤旨外謫稍遷南工部隨罷免情少聘韓氏女病廢或勸改圖不聽女亾始議婚性忼直言論丰采有古人風著撮殘稿藏于家從弟愷

龔愷字次元號全山嘉靖丁未進士授慈谿令入爲御史會咸寧侯仇鸞倡馬市首疏論之杖闕下得不死出視兩淮鹽政又按西粵屬吏不職者輒望

上海縣志

卷之十

三  
名臣

風解綬去尋列靖江王驕恣狀復疏止大征粵寇上是其議當事者以此忌之出爲山東叅議屬大蝗愷下令捕得蝗者易粟倍於是蝗不爲害遷湖廣副使引疾歸卒

董傳策字原漢綸曾孫也九歲能屬文嘉靖庚戌進士是時嚴嵩父子怙寵不法諸臣以直言觸忤抵死者數輩傳策爲刑部主事偕給事中吳時來同官張公翀疏劾嵩六事請斥之以謝天下上怒下詔獄推問主使榜掠慘酷絕而復甦者再會地震



得宥謫戍南寧時按粵者爲嵩私人傳策短衣大  
帽跪舟次呼曰軍人董某見御史趣迎之幾墮水  
有宣慰某齎寶劍玉幣求謁止戶外移日叱却之  
隆慶初復原官尋擢南京禮工二部侍郎爲人清  
介而待族黨有恩然性剛繩下嚴急臧獲懼不免  
遂及于難所著有採薇幽貞等集景獻奏疏若干  
卷第晉隆慶丁卯舉人晉孫象恒萬曆己未進士  
官浙江巡撫都御史自有傳

唐繼祿字子廉嘉靖癸丑進士除遂安令下車募壯

上海縣志

卷之十

七

名臣

勇數百人儲粟數千石爲備未幾倭寇內地所至  
殘破遂安獨全有殺人獄旣具稱寃不已往驗無  
傷惟胸前道斂如石繼祿曰若飲之適乎囚叩頭  
服召拜御史值歲大旱疏修省十事又奏行里甲  
法著爲令出按湖廣會興山盜鑿礦行劫聚衆三  
千餘人縣官利賊礦匿不以聞郡守徐學謨上狀  
繼祿卽下檄先縛縣令囚之而陰遣沙市趙巡檢  
詣賊寨諭以朝廷威德令早自解散人給一符待  
以不死還籍者隘兵驗符毋擅誅月餘賊黨盡散



歸里閉門養重卒年僅四十五所遺圖書數卷而已孫曾彬蔚能以清白世其家

王圻字元翰嘉靖乙丑進士授清江令調劇萬安入拜御史峭直敢言卒忤時相出爲福建僉事時巨盜張文欽等聚衆剽掠積年圻設方畧殲之餘黨解散而忌者復構他事謫補曹縣量移開州尋備兵武昌改督學興福建山東鄉試所獎拔多爲名臣遷陝西叅議致政歸初圻以奏議爲內江相趙貞吉所推江陵張居正與內江交惡諷使攻之不

上海縣志

卷之十

三 名臣

應新鄭高拱圻座師也時方修隙徐文貞公階又疑爲私其鄉人不助已恚甚遂摧抑之里居著書至老不勅卒年八十五所撰有續文獻通考稗史會編諸書見藝文志皆經世大著作云

趙灼字時章嘉靖丙辰進士授行人考選刑科給事中疏陳三吳水災乞蠲賦言甚詳懇轉戶科時江南民歲轉廩於諸曹人衆地分奸蠹百出灼疏請立祿米倉以司徒屬一人主之歲省民財以萬計遷吏科都給事中晉右通政卒年四十五兄廷炯



嘉靖乙卯舉人官至潯州守以才行稱係東曦自有傳

張仲謙號受所莊懿公五世孫嘉靖己丑進士時徐文貞階居政府其夫人仲謙姑也仲謙與諸進士旅進旅退未嘗私謁授兵部主事居武庫七年大司馬楊襄毅爲文貞言武庫郎賢且積資久宜置要地以語仲謙漫不應謂兩尊人春秋高願得外補以便省覲遂出爲湖廣參議文貞旣罷相新鄭高拱修故郟根株其親黨仲謙入覲見拱拱迎問

上海縣志

卷之十

三 名臣

曰君與徐公戚乎仲謙曰徐公夫人家姑也拱改容謝曰真古君子徐公在事何久不聞公名仲謙爲治清靜寬易多所平反囚某年十二以奴傷人抵死仲謙以罪坐奴竟出之遷雲南參政當黔國兄弟構隙幾弄兵爲難仲謙移檄留都分別其事解之俄聞父喪歸堅臥不出隱居三十餘年年八十六卒從弟烈同年進士

潘允哲號蘅齋恭定公恩子嘉靖乙丑進士授新蔡令持淮汝水溢漂沒民居請穀賑卹流移盡復調



義烏徵拜御史按上江出守黃州治務簡靜民親而畏之擢山東副使遭母喪去官服闋督學陝西規條嚴密士翕然從之得父手書心動卽解綬歸承藉世資不事家人產贏衣菲食應門僅一老蒼頭卒之日知與不知皆流涕

潘允端字仲履嘉靖壬戌進士歷官叅政總理漕儲交兌後期運不時至允端督有司勒諸官軍以二月至淮五月入閘八月並達天津又于瓜洲建閘以避江濤令白糧民船尾漕艘而進永免民運瓜

上海縣志

卷之十

三 名臣

儀之苦淮撫王宗沐特薦允端擘畫海運允端躬歷沿海要害申明賞罰凡爲艘三百有奇運糧十有二萬石不一月至天津自會通置河以來所未曾有說者謂海運通則河不能爲梗可以佐漕而或以爲乘危倖功遂格不行後晉四川布政移疾歸構樂壽堂奉養恭定公以篤孝稱中子雲龍弱冠入成均值選中書故事皆以賢進惟雲龍以文得選會雩祭明神宗將步禱南郊見閣選潘名曰朕方祈甘澍雲龍二字佳識也遂授武英殿中書



舍人有萬花樓集及六體千字文法帖行于世第  
四子雲鳳以允端致仕早母顧氏封不及格及雲  
鳳官羅定州同知應得贈因疏請進母爲夫人如  
父階詔許之蓋異數云孫桓明天啓丁卯舉人有  
文名曾孫堯彩順治乙未進士郡稱世家者首推  
潘氏云

艾可久字德徵嘉靖壬戌進士授太常博士擢南京  
御史巡視上江劾勲貴驕縱及附新鄭大臣者四  
人遷知衡州府屬縣有議增商稅者執不可其政

上海縣志

卷之十

三三 名臣

以緩催科興學校爲務擢山東副吏累遷江西陝  
西叅政革田稅飛洒出美金賑饑再遷按察轉山  
西布政入爲南京太常卿晉通政使請告尋卒孫  
廷機字平菴幼失怙恃依祖成立及可久卒廷機  
請于朝予祭葬營墓域如禮由太學生授中書舍  
人旋告歸輕財任俠鄉黨賢之孫汝成康熙丁巳  
舉人

徐汝翼字君羽嘉靖乙丑進士初授刑部主事入遷  
至廣西布政使會徭徭倡亂汝翼奉勅會諸監帥



壽餉調兵相機勦撫粵西底定遂疏乞致仕歸初  
汝翼在郎署其座主高拱以輔臣攝吏部事汝翼  
終歲無私謁清風高節鄉黨咸推重之

陸鄰號三山文裕公孫以廕起家都察院都事時臺  
長以鄰世族少年心易之及議事鄰援據典故風  
發泉涌始肅然改禮焉後授石阡守石阡古夜郎  
地苗獠錯居徭役龐雜鄰倣吳下條編之法著爲  
令吏民德之郡僻陋無書籍鄰家輦經史教之士  
始向學又播酋思亂鄰經畫密剪其角距事具德

上海縣志

卷之十

三 名臣

政錄中請告歸家居二十餘載內行醇備無愚智  
皆尊禮之歿祀郡邑鄉賢祠長子堦有令德世其  
家

喬水字伯梁爲諸生時遇倭寇守陴殺寇過當知名  
于時隆慶戊辰成進士守安吉州州當貢粟木上  
言明主奈何以口腹累民請罷貢報可擢河南僉  
事并陘兵備道值茨溝營卒多烏合盜礦不可踪  
跡乃選土著八百人充伍漸汰諸募者盜以是息  
歲祲以便宜發粟全活甚衆遷福建叅政解組歸



子拱璧自有傳

李伯春字友鄉昭祥從子也隆慶辛未進士授刑部主事以明允爲尚書嚴清所器使脩定條例轉郎中出知濟南府屬歲饑民王登以妖言煽衆擒置之法出倉穀鉅萬斛賑貸人心遂安遷浙江副使轉湖廣叅政守陵宦者孫某欲奪民沙洲田又橫索里夫折值皆挫抑之尋以母老棄官歸弟仲春叔春皆親自教授叔春登萬曆己丑進士歷官歸德知府值河決後城郭傾圮饑民數萬聚葦澤剽

上海縣志

卷之十

名臣

掠監司欲興兵勦滅叔春固請解散之皆感泣來歸又蠲逋責牛種戶口漸復後論調歸起按察副使乞休伯春兄弟同堂共爨友愛甚篤仲春當伯季仕宦常主奉養孝謹尤著及歿室無私財伯春以產均授其子焉伯春第二子繼厚萬曆戊午舉人仲春孫之楠天啓辛酉舉人

王文炳字象南隆慶辛未進士授四州叙州推官叙有山峒名九絲蠻者卽孟獲後時出掠女口貨財官兵逼之則入關關名凌霄地險絕蜀撫曾省吾



議進討檄文炳贊畫文炳乃自畏瑄帥師從山後入破凌霄馘蠻王阿大阿耆等設武寧衛城上其功晉秩一階入爲刑部郎尋出知慶遠府遷貴州副使致仕歸卒年七十六

陳所蘊字子有萬曆己丑進士授南刑部調吏部出爲江岳叅議俄遷大名副使皆有風績督河南學政人莫敢以私干之尋分守大梁有好弁上疏請覈河南羨帑者乘驛按問同事震懾所蘊辨折屈服之弁坐誣妄被逮未幾乞休後起南京太僕少上海縣志

卷之十

名臣

卿甫半載趣歸所蘊性方嚴已請老地方有大利弊片言而決年八十四卒

董其昌字元宰父漢儒耿介力學其昌自外塾歸漢儒夜從枕上口授經義萬曆己丑成進士選庶吉士禮部侍郎田一儁以教習率官其昌請假走數千里護其喪歸葬還授編修知起居注明光宗出閣充日講官因事啓沃光宗每目屬之主考江西尋有忌者出爲湖廣按察副使陳疾歸三十二年起爲湖廣提學副使踰年致仕疊詔起用並不



就光宗踐祚問閣臣曰舊講官董先生安在乃起  
爲太常寺少卿掌國子監司業天啓二年改兼翰  
林院侍讀學士纂修實錄奉詔至江南採錄諸司  
掌故凡萬曆朝章奏案牘輯爲三百本其留中之  
疏有切于國本藩封人才風俗河渠食貨吏治邊  
防議論可施行者別爲四十卷倣史贊之例每篇  
繫以筆斷書成表進有詔褒美宣付史館三年遷  
少詹事掌南京翰林院轉禮部右侍郎四年充纂  
修實錄副總裁同知經筵尋轉左侍郎還部五年

上海縣志

卷之十

名臣

遷南京禮部尚書時政在奄豎黨禍深酷其昌濂  
自遠引遂謝政歸崇禎六年召拜禮部尚書掌詹  
事府事七年進太子太保乞骸骨溫旨慰留章七  
上乃允賜乘傳還九年卒年八十二訃聞輟朝賜  
祭葬贈太子太傅謚文敏其昌天才俊逸善談名  
理在講席見知于光宗爲僉人所忌然不激不隨  
故免于黨人之禍少好書畫臨摹真蹟至忘寢食  
中年悟入微際遂自名家行楷之妙跨絕一代其  
畫集宋元諸家之長行以己意論者稱其氣韻秀



潤瀟灑生動非人所及也四方金石之刻得其制  
作手書以爲二絕造請無虛日尺素盈札流布人  
間爭購寶之尤精于品題好事家至今引重焉所  
著有容臺集行于世

姚永濟字通所祖一祥肄業太學嘗拯湖州一生於  
厄而不問其姓名後就選除臨江知事時直指劉  
某按部見一祥各召謂曰先生尚識余耶余故湖  
州遇難生也無以報公察有寃繫五人罪可釋公  
第與言可致千金爲壽一祥唯唯卽上繫者名于

上海縣志

卷之十

名臣

直指釋之詭云得金而陰却不受一時傳爲盛事  
永濟萬曆戊戌進士初令東陽值歲荒出粟賑濟  
活民數萬俗豪家婢女白首不得婚配永濟下教  
凡婢女年二十以上無夫者罪其主匿不告者罪  
其隣惡俗頓改調煩永嘉尚教緩刑民不忍欺遷  
刑部主事以政寂擢禮科給事中時楚王被誣禁  
錮子女一百二十餘人廷臣莫敢言永濟獨抗疏  
曰細民有過尚且恤刑豈皇祖雲初之裔而不蒙  
覆盆之照乎今天潢一派九載沉墜平反何日乞



賜生還以篤宗盟上感悟卽詔歸國時論偉之會  
考選宗藩特命永濟董其事當時有姚公桃李皆  
皇族之語亦異數也在諫垣章數十上聲望藉甚  
後持節封周藩嫉之者擠之外遷湖廣副使不就  
請終養崇禎二年備兵太原尋轉浙江之左布政  
時有給事督餉浙中永濟不爲禮銜之遂劾免  
國初有妄男子糾衆劫其家罄盡永濟處之泊如  
也好參同內景家言採錄類書二百餘卷爲學撮  
六卷年九十七卒弟永豫外衛經歷好施樂善有  
學生以詩文名于時

上海縣志

卷之十

人名臣

一祖一祥風子賡明襄明俱恩貢生永豫孫廷讓太

張所望字叔翹萬曆辛丑進士除刑部主事奉使榮

襄靖江三國餽遺一無所受諸王欽企焉出守衢

州衢俗囂訟而奸民左右兩造間詭譎競利所望

廉得其名閱詞輒知主文者某某卽逮訊窮治剖

決若神衢以大治遷副使備兵蒼梧時嶺表法令

久弛望至繕城隍寔倉廩簡屯戍若藤峽崑崙

鬼門漏諸要害無不身歷慰撫窮山炎谷喜見



大吏皆搏頽受約束有羅暹徭者阻溪洞戕殺熟  
徭所望馳檄諭之遂輸貢爲編戶蓋漢以來所未  
賓也轉左江叅政隆峒長官黃兆基少子與其兄  
遺孤爭襲仇殺累年所望討平之將吏請郡縣其  
地所望曰師以定亂奈何斬人祀以自利耶置其  
長而還擢廣東按察使不就起爲湖廣按察使理  
漕政時兵興轉輸煩亟以積勞疾作解職歸再起  
山東右布政使固辭不拜所望清羸如不勝衣而  
當大事力持正議侃侃不阿急人之難無遺力常

上海縣志

卷之十

三 名臣

買一婢詢知爲名家子也撫爲已女擇婿具奩飾  
嫁之年八十卒所著有梧濠雜佩嶺表游記幅員  
名義攷文選集注辨疑龍華里志

黃體仁字長卿萬曆甲辰進士時館李文節廷機家  
廷機使試館職體仁謝曰某老矣不足以辱此選  
有門人徐光啓者博學而賢用世才也請以自代  
故光啓入翰林而體仁爲刑部主事遷員外郎轉  
郎中出知登州罷坊市雜稅豪右歛手衛有明建  
文忠臣陳廸孫在戎籍爲之陳乞脫伍并爲廸請



謚秩滿擢東兗道副使值歲祲而福王之國舟車  
填奏體仁裁制以法因條上臺盡革迎謁供億諸  
費民甚愛之而當路不悅罷歸所著奏議詩文雜  
著二十六卷撰續上海志田賦諸篇稱詳核云

徐光啓字子先萬曆丁酉舉順天鄉試第一甲辰成  
進士選庶吉士光啓善聲律及是悉棄去籌經濟  
大畧可施用于世者授翰林院簡討充會試同考  
官擢少詹事兼河南道監察御史勅使練兵監司  
副將俞受節度得自辟召委任天啓初與兵部尙

上海縣志

卷之十

卑名臣

書崔景榮議不合御史丘兆麟誣劾之謝病歸大  
闔魏忠賢素嫉光啓諷御史智鋌追論練兵事勒  
罷官崇禎初起禮部右侍郎協理詹事府事同知  
經筵時懷宗方用兵憂國用匱乏御經筵嘆曰大  
禹時天雨金秦雨金于櫟陽此外寧復有是乎光  
啓曰周成王時亦有之他日讀離騷問曰圓則九  
重天有九何也光啓對曰宗動一天也恒星一天  
也七政各一天合而爲九因及日月薄蝕五星順  
逆之故日昃始罷退復上言京東西屯田及曝沙



種鹽策數萬言懷宗動容嗟賞意竊用之轉左侍郎旋加太子賓客是夏日食失驗欲罪臺官光啓言臺官測候本郭守敬故法歷久必差宜及時修正從之乃詔修曆勅光啓領之初劉基造大統曆雖用授時法而郭守敬之術不傳守敬之言曰古之日長今之日短當以七十五年爲消息上在益一下推損一天官家莫曉也光啓獨得其意以泰西勾股測弧之法三線交而布筭用測圓弧以黃道緯度爲主視授時用黃道距度其法加密曆成

進禮部尙書掌詹事府四年夏懷宗手勅光啓以本官兼東閣大學士參機務再進兼文淵閣大學士加太子太保時周延儒愾體仁先後爲首輔光啓年已老不得展其力用居嘗鬱鬱六年秋卒于位訃聞輟朝三日賻賜有加贈少保謚文定詔求遺書于中書舍人驥入謝進農書六十卷進贈太保錄其孫爲中書舍人命有司刊布其書又有毛詩六帖漕河議兵事庖言幾何原本歷指等書總百餘卷



葉有聲字君實號震隱天資絕人嗜學不倦萬曆乙卯舉應天鄉試第一丙辰成進士越二年殿試釋褐除侯官令邑當省會衝煩倍他屬有聲先機密畫均役省徭不事筭楚而賦辦事集天啓五年擢禮科給事中時上佚豫內廷委政宦寺有聲首言四事一勤政二治體三言路四仕途又云天下猶器也久而不操將有授之柄者願皇上熟思治亂之關以公論還政府以直道還臺省天下幸甚方大闢魏忠賢柄國屢攘邊功以竊封爵有聲新叅上海縣志

卷之十

聖名臣

入直疏有疆場赤白其羽幕府衛霍其勲一語忠賢深銜之闖黨又宣言于朝欲進忠賢王爵有聲衆中叱之坐是削籍懷宗嗣位凡璫斥逐諸臣俱環召陛見引問去國始末奉有勁直可嘉之旨其他抄叅封駁挺然不阿爲忌者所抑外轉浙江副使六年補分守武昌道時湘陰寇東下直逼省城有聲登陴捍禦寇知不可乘引去七年遷福建叅政尋轉河南按察使平反讞決朝上夕報無留獄焉流寇老獍率賊數萬直抵大梁有聲與撫按



協謀使驍將陳永福以奇兵繞出賊後而城中大出兵應之賊奔潰追斬數百級越三月賊憤前敗悉衆來攻乃堅壁清野相持月餘賊乘夜隧道以入發火器殲之解圍遁去以功遷江西右布政使擢南太僕卿俄召拜大理卿力持法守聲望蔚然特簡左副都御史召對條奏兵食利弊甚晰懷宗動容嗟嘆久之由是獨持風紀孤立于門戶之外忘者益衆時臺端虛位有聲攝院篆而首相薛國觀清鯁剛決見愠羣小儉人某營求科道不得怨

上海縣志

卷之十

聖名臣

薛與有聲次骨遂陰構大獄薛賜死而免有聲官迨某坐法伏誅始獲昭雪召拜少司馬不就屏居村墅與兄有容有成白首周旋以爲善相勗里人多其厚道私以佛子稱之卒年七十九所著有綠天館文集疏議四卷子翔龍歲貢生景龍恩貢生映榴辛丑進士翰林院庶吉士陝西提學僉事喬拱璧字穀侯副使木子也萬曆丁未進士除海鹽令縣土田詭匿肴雜不可稽拱璧按故籍履臥勾考悉得其實覈虛丁絜而均之一邑稱平所隸廣



儲常積二倉衛士雜支本折侵耗百出拱璧請以  
冬月支屯糧夏月赴府支銀錢春秋月支倉米人  
予左券合驗而給之詭冒並絕遷工部主事改兵  
部武選司左遷順天府教授尋陞南兵部郎出爲  
湖廣僉事轉叅議未任卒

楊萬里字孟圖萬曆丁未進士授浙江餘姚令調繁  
錢塘寬仁廉潔有循良稱西湖葑草壅淤因疏湖  
築隄與蘇隄相望號楊公隄載西湖志中縣有豪  
民傳時傳曉恣惡不法萬里捕得立斃之籍其家

上海縣志

卷之十

名臣

出私弄械禁者數十人初捕二傅時同官行萬金  
請緩萬里正色拒之冬夜子女號寒孺人意色愁  
慘萬里笑曰此非惡聲也政最擢湖廣道御史尋  
卒錢塘士民建祠湧金門外至今祈禱如響云

張肇林字茂卿號咸池萬曆丁未進士除江西萬安  
令愛民如子調房山政如萬安云時中人劉進朝  
封占周口廢廠村民失業肇林上其狀于臺使云  
職何愛一官何愛一身使周口有廠而房山無民  
乎得盡逐之民賴其惠遷刑部主事具熱審停刑



疏恤刑四川多所平反擢南通政司叅議尋罷歸卒于家

趙東曦字馭初右通政灼孫也萬曆己未進士除閩縣令閩賦籍掌於收吏而納者無左券金粟入官吏或以意多寡之莫能辨也東曦始給印紙官民各執其半如吳下法奸詭遂絕丁父憂服闋補金華尋復丁母憂起補嵩縣居三月以前後政叅徵拜刑科給事中時奄人王坤監鎮宣大巡撫沈縻以失策逮東曦劾奏王坤職在監視厥罪惟均乞

上海縣志

卷之十

聖名臣

正坤罪悉罷中使監鎮之任奏入降旨切責謫福建布政司都事稍遷行人司司正禮部郎中奉使還里卒于家未幾王坤治邊無狀朝廷追思東曦之直而不及用識者惜之子子瞻順治辛丑進士董象恒字有仲萬曆己未進士時年甫二十四一榜推年少除守開州州戶役莫困於馬頭吏緣爲奸象恒區別貧富爲量助貧者悉免役于是平時白蓮倡亂突犯州境象恒率壯丁捍禦擒斬州城以安遷兵部郎中出爲右叅政分守漳南值海寇鄭



芝龍猖獗撫按檄象恒分道勦擊克之復與遊擊  
歐陽瑞撲滅山寇於冷羊頭巖閩海底定旋告歸  
省親遂乞終養侍親十三年如一日服除補福建  
屯鹽右叅政屯鹽夙爲弊藪象恒悉心釐剔商民  
便之刻屯鹽全書於閩署中特擢右僉都御史巡  
撫浙江召對稱旨賜酒膳銀幣到官屏却餽遺正  
己率下莫敢干以私是時需漕孔亟而浙艘回空  
獨遲期迫則封民船以濟象恒稔知其困捐俸爲  
十一郡倡屬吏爭先樂輸造漕船五百有奇不費  
歸坐臥斗室叅閱內典年七十而卒

公帑不擾民間督漕史可法題叙下詔褒美會流  
寇竊發徵兵勤王象恒發援師四千入衛爲天下  
先時頻年災荒萑苻嘯聚象恒奏請蠲賑賊漸解  
散故各省多殘破而兩浙獨完忽以蜚語去官民  
爲罷市詣關訟寃者萬餘人上感悟得免旋移疾  
張元玘字采初號三陟少孤力學登天啓壬戌進士  
除刑部主事奉使賫餉寧夏所過餽遺及王國賜  
予皆辭不受遷員外郎轉郎中時大獄屢興力求



外補遂出知嚴州旋調繁建寧府府衙劇郵傳疲困元玘事爲裁制立條約請臺使勒之石由是供億不擾又更鹺政及錢法民皆便之覲行屬邑例有長夫假寓諸公費一切却之策蹇北行口占有言五馬貴我獨兩驢輕之句未幾告歸有以失位唁者笑曰拙宦非性所宜今得課子若孫足矣居鄉產不踰中人好行其德徐方伯汝翼歿後貧不能葬元玘經紀其事連舉十喪一時義之所著有廣史及雜著詩文數十卷尤精六法遠近得片

上海縣志

卷之十

名臣

紙珍若拱璧焉子在簡爲諸生有名慷慨好義工詩文廬墓課讀孫錫懌成乙未進士鉛鋌皆登仕籍人稱爲世德云

李逢申字延之長史伯璵五世孫也萬曆己未進士除慈谿令失闡黨意左遷縣佐丁母憂服闋起上林苑監丞遷工部主事甫三月封事九上劾兵部尚書梁廷棟誤國疏寢不報會軍興驗試火器廷棟中以危法論戍澉浦逢申長子雯痛父以詆忤權貴獲罪走京師訟寃章上報罷後雯弟又伏闕



上書政府哀之事得白召逢申爲刑部主事轉工部郎逢申又五上疏論時政有所彈擊時寇已奄有秦晉逢申疏請出空名告身與廷臣分募三輔山東兩河豪傑衛京師廷議中沮甲申三月賊陷京師逢申被執不屈身受五毒自經死雯時從父在邸舍已不食四五日聞難絜血行乞得棺朝夕捧壺漿跪奠哭不絕聲又餓且病氣息纔續守父骨不復動及

皇朝破賊收京師內院諸大學士憐雯孝奇其才

上海縣志

卷之十

哭名臣

薦授弘文院撰文中書舍人丙戌得請于朝以父喪歸葬事竣卒雯以文章名世卽海內所稱雲間李舒章也

顧國縉字寅美萬曆丙午舉人授崑山教諭遷南國子監丞天啓末操江都御史劉志選詔事魏忠賢稱爲德齊至聖當建祠文廟左祭酒羅喻義不勝憤疽發背餘莫能抗國縉奮爭曰誰敢爲先聖萬世罪人國縉誓以死守祠不可建志選恚馳使愬闈謂國縉本顧憲成族子中以黨禍會熹宗崩乃



止遷南刑部郎中出知常德府擢按察副使分巡  
桂林猺賊寇平樂諸郡縣國縉卽用猺人攻之擒  
其渠餘黨解散未幾楚寇來犯復以猺兵擊破之  
賊遁方論功以疾請老甲申三月京師陷慟哭不  
食死

朱長世字子久天啓壬戌進士除工部虞衡司主事  
時方用兵軍械皆取給于部長世移臥公廨視事  
尙書張鳳翔知其忠勤題薦七日內兩轉爲正郎  
會六軍守城需懸簾十萬一巨燭夜詣部曰予我

上海縣志

卷之十

名臣

十萬金可立辦母問所從來蓋內庫所蓄也鳳翔  
謀于長世拒弗與竭三晝夜之力而懸簾具燭恨  
之懷宗出按軍壘璫摘其一二疏薄者中以危語  
上震怒鳳翔下獄長世廷杖死長世素孝友敦睦  
其卒也士大夫痛惜之子在鎬壬午舉人

張元始字貞起號訥叟崇禎戊辰進士性方嚴不妄  
交游爲諸生時卽留心經濟故尤嗜史學時瀕海  
竈戶舊有總催一役武地棄而役存居人重困元  
始力陳于熾使釐剔一清由行人擢給事中抗疏



直言封疆失事保舉非人侃侃不怵權勢有詔嘉納又江南大役莫苦于北運布解富室往往破家元始條奏其弊請北運改爲官者布解附于漕艘報可民力以甦崇禎十四年大旱斗米千錢上海漕數萬吏民皇皇無所措手足元始建議以麥代米得旨准十之三以麥價徵折色先行于豫遂及江南公私俱利先是江南漕運後期又積年逋餉百萬懷宗特簡科臣催督元始星馳受事朞月之內輸輓無阻徵解逋賦至九十萬國用賴以不匱

焉元始才識開敏於前代成敗得失及本朝掌故毫髮不爽在諫垣八年清忠諳練朝廷將大用之會遭母喪去職服除起太常卿未拜歸隱卒年六十九士論惜之

陳正中字宗尼崇禎戊辰進士除上杭知縣縣介處粵流寇侵擾所在煽結正中至撫定凋瘵鳩集遺散調兵食練鄉勇屢挫賊鋒獲渠帥張日昇降其支黨五百餘捕誅劇盜何柏等三十餘人所部肅清革橋稅以惠商旅積粟備荒歲饑不爲害流賊



復犯武平正中率衆持五日糧趨三百里擊之頗有斬獲賊望風引去隣邑以完正中素有羸疾積勞轉篤卒于官在縣五載屬軍興旁午大帥駐節會師供億煩重能盡心惠養民不知有兵所積官穀七千餘石羨餘贖鍰悉歸庫藏公私充實而妻子衣食不給卒之日民罷市哭巡撫鄒維璉上言正中撫順討逆鞠躬盡瘁清白勵操遺愛在人請賜官崇祀以昭激勸勅贈兵部主事追論平寇功再贈太僕寺少卿

上海縣志

卷之十

至名臣

何剛原名厚字慤人崇禎庚午舉人性孝友諒直以節義自許才學通練知名於時太守方岳貢修築海塘自青村至柘林幾數千丈聘剛經紀其役三年告成費省工倍永無水患鄉人立祠祀焉官兵部員外郎監軍維揚遇難

國朝一人

朱紹鳳字蒿菴順治己丑進士除臨縣令有惠政奏寢擢居諫垣以敢言自任時江南漕兌困敝直指馬騰陞奏請官收官兌而諸縣猶有陽奉陰違者



紹鳳詳陳利弊得

旨允行其法始定民咸賴焉順治十六年會推總漕  
某衆皆唯唯唯紹鳳獨昌言其不可後疏故周亮  
工降謫閩中然亮工之獄亦藉以解康熙三年有  
摘發紹鳳請復漕儲一疏急徵至京事大白以疾  
卒



獨行

宋一人

俞彌恭北橋人與子端皆好與樂施凡售物者自百  
緡而下一聽所邀償之糴者每百斛必誤唱籌以  
禪其不足人謂之癡孫彬生四子各英雄俊傑英  
四世孫宗源祖父繼喪撫幼叔鏡成立事祖母以  
孝聞邑中推爲世德

元九人

瞿霆發字聲父其先汴人宋南渡居上海霆發幼穎  
上海縣志

卷之十

五 獨行

悟書一覽成誦元兵次臨安遊騎及境霆發年二  
十六挺身兵間率衆歸附境賴以全爲下砂鹽場  
副使提舉上海市舶俄遷兩浙運司副使海潮壞  
鹽場死者萬計霆發傾力拯之流亾復還鹽事以  
集仁宗時以捕蝗功奏拜運使浙東饑疫霆發稽  
戶數第物力而振救之更以最聞召見使未至而  
卒霆發事母孝得時物不敢先嘗喜賓客樂賑施  
西湖書院上海縣學咸田資助鄉隣貸貫不償  
不責也嘗有貧士僞作運使張文質書來謁霆發



命門幹贈以楮三定幹鄙其人未與寔發知之更取五定溫言勞遣之或問其故曰汝何知彼何不作書與汝時人服其量

何敬德號孤巖善人浦東民家子謹愿不妄言笑善會計事吳郡張瑄行舶筦庫不數年贏羨無算敬德不以毫髮自私瑄父子方倚任之亟辭去瑄既貴盛敬德布衣蔬食以施貧賑乏爲事勸瑄父子毋嗜進厚藏以速禍及瑄敗逮誅黨與而敬德獨全大德十一年杭州大饑官設粥賑之敬德擇好

上海縣志

卷之十

五十四 獨行

善有材智者數人卽菩提寺作粥納大瓮中明且饑民先後至者令相向坐廡下虛其前以行粥食已以次去凡七十日饑民無一死者明年春敬德集諸好善者收聚遺幣枯齒數十萬具瘞之語在破衣傳卒年五十七時皆稱爲何長者而不名

任仲孚好義樂善大德開饑發米二千斛穀八百斛以濟貧乏部使者上其事詔旌其門擢其子良佐溧陽縣儒學教諭長輔信州疊山書院山長

章夢賢字思齊宋莊敏公築九世孫孝友通練儀觀



偉然至順初浙西大水朝廷募民賑五百石以上者爵有差夢賢出粟二千餘石而不受爵詔旌爲義士之門至元中以孝友薦授襄陽建康等處營田財賦提舉以父母俱喪不就官置義庄建義塾以教養鄉人兄歿撫其孤如子闔門二百口未嘗有間言葬崧宅里揭俛斯志其墓并書子元澤字吉甫性孝而好義父夢賢營義塾未竟而卒元澤感慨流涕乃崇齋宇飾廟貌爲清忠書院以仁宗所賜郇國公得象清忠二字名也出贍田一千

上海縣志

卷之十

五  
獨行

一百畝資師弟子及祠祭之費初爲丞相府舍人累遷奉政大夫海漕鎮撫以母老棄官歸養年八十五卒

唐煜字仲明世居華亭後徙海隅鄉遂爲上海人業不踰中人能自致饒富元至順庚午郡大水出粟五千斛於官以賑境內事聞授浙西袁部場司丞秩滿轉江西蘆潭批驗所提領俱以廉幹謹慎稱年七十乞休致賜七品秩授徽杭等處權茶副提舉又出粟賑饑至老彌篤卒年九十生四子九孫



五世同居內外雍穆遠近賢之

杜英發字俊卿祁國公衍九世孫仕建寧學正遷教授歸隱西霞浦上號西霞道人初季父某無後養莫氏子爲子後復以英發爲後及季父歿悉以產歸莫氏子復爲之冠娶待之不異同氣族困於徭役首倡置義田儲粟若干石以資之隣里婚喪皆有給其勇於義如此而貲產不逾中人云

徐誠字信之畜田至二萬畝遂雄一鄉嚴於治家有儀法旣富能賑施三族及鄉里之不能婚嫁者病予之藥死給之槥汲汲如不及庚午辛未歲大疫煮粥挾饑活萬餘人年四十六卽屏妻妾斷葷肉以內外事屬二子日轉法華經積至萬卷復鋟梓印施四方所居多重洲複浦爲梁木以通往來人不爲病

上海縣志

卷之十

五 獨行

金子安字幼仁居漢成里事後母孝母嘗遘疾子安稽顙北辰求以身代母危困中忽甦曰適神語我加爾壽三十四及母歿距神語時三十四月也居喪毀瘠鄉隣徃徃感激改行嘗市地於隣除之得



白金一罌亟召其人歸之時又多其義

趙恭字思恭家貧好學母方臥疾久不愈恭憂悴不知所爲乃齧臂肉作羹啖之疾尋愈父通患蠱疾其弟敬割股肉爲糜以進亦愈時並稱之

明 四十二人

顧鰲字克載端方鎮靜有古人風應貢入京師廷試第一授黃陂教諭訓諸生必先德行以身範物化行一邑黃陂人祀之名宦歸家時策紫竹杖訪故友清談未嘗乘車嘗舟行墮水猶讓同溺者先登

上海縣志

卷之十

七

獨行

其不苟類如此學者稱爲遜齋先生

陸文旺號德林三歲能識心斗二宿見者驚嘆長好讀書斲于經濟實用士望歸之里有就之質成者誨以大義感悟去處家篤於孝友比楊苗之亂流寓茗溪里人指而言曰此陸德林先生居也洪武三年詔舉郡國賢良拜武昌府倅當僞漢兵燹之餘茹淡服勞悉心撫字尋擢守饒州乞骸骨歸出俸金分賚其宗親曰毫末皆國恩也年八十九卒

沈得四洪武十一年祖母張遘疾得四割股食之卽



愈久之祖病得四又取肝作湯以進隨飲而瘳有司上其事下詔旌之仍徵授太常寺贊禮郎其後有鑿者少喪耦不娶人稱義夫有司旌之

劉仲禮字用和以春秋明經辟召至應天遇靖難師入不食七日而死二世孫鈍兄銑永樂間以會計事坐法繫京師鈍婚二日卽趨裝護行後兄思歸鈍陰乞守者代之兄歸給父母謂弟病道率父母悲哀不已會刑部訪善書者獄吏以鈍聞試之稱善爲釋其罪而禮遣焉比歸家人驚以爲鬼鈍具上海縣志

卷之十

彘 獨行

告其故與父母對泣兄自媿逸去鈍亦不明兄之給已也鈍子與官至建寧知府

張年字公壽元季從鴛湖避兵海上因家焉父綸爲太醫嘗以事被逮年徒跣詣闕冒死陳狀卒白父寃後以名醫徵不就永樂中廷臣薦其才下詔徵聘年復固辭時人高其雅尚爲詩文工而有法所居白沙鄉舍傍隙地種杏成林人稱杏園先生有杏園藁及卒四方名流各賦詠章輓之有蘿室半間俱是藥雲山千頃總成詩又舊業尚餘芸閣在



春花空發杏園幽之句其見重于時如此

楊珙字廷瑞幼穎敏讀書過目成誦永樂丁酉舉鄉試第一明年登進士改庶吉士授編脩以疾告歸卒珙性至孝以祖德亨從宦葬河南之靈寶百方規畫卒返其柩于鄉祖母蔡臨終遺言用浮屠法火葬珙曰非治命也卒棺殮如禮

張穀字濟民成化乙未進士祖衡爲御史建言卒貶所穀初授中書舍人直內閣尋引疾歸弘治初起脩憲宗實錄錄成同事者皆進官穀止加俸恬無

上海縣志

卷之十

五 獨行

一言又三年遷湖廣參議提督太和山一夕沐浴晨起更新衣出廳事方執筆判署日微瞑扶歸卒穀風度清遠眉目秀朗如畫與人言從容簡當無厲色遽詞事母至孝養二姊終始以禮子抑明經三爲學官却餽周貧著有却帶說却銅雀硯文

楊松字國用家貧竭力奉親爲父吮痔及母病不能食刲臂肉脩藥以療後父邁危疾復刲股作羹以進家益落爲人傭以贍養有司上其事復其家

張鳴謙字汝益萱長子正德丙子舉人爲温州司理



有善政擢順天府通判謁御史用京兆故禮長揖  
御之誣劾廷杖已而得白復其官歲餘請骸骨歸  
宰相張治高之榜其廬曰完名勇退鳴謙居鄉十  
餘年好義樂施鄉黨賢之卒年七十四

唐琛字廷璧少以孝友聞不樂仕進父疾奔走湯藥  
三年如一日明成化丁未以恩例授金山指揮使  
琛力謝致仕澹然榮利士論多之

張紘字文儀少有至性一月七喪哀毀營葬如禮正  
德間由進士知桐鄉擢守高唐州時流賊寇高唐

上海縣志

卷之十

卒獨行

紘增墉浚濠料丁壯親肄武事賊遂竄伏部民白  
某地有窖錢發之可得數十萬紘不應治嚴處二  
郡簡靜不擾投劾自免歸耕蘆子渡西與傭保相  
雜作未嘗乘車行里中一夕攜童子從田間還邏  
卒呵止之紘遜避詰旦知爲官人蒲伏陳謝徐慰  
遣之嘉靖初用廷臣薦起知建昌府卒環堵蕭然  
有清白聲

張倫字文簡號林趣居七寶鎮以氣槩自雄好讀左  
氏春秋及歷代史尚志節有古俠烈風宣德中郡



丞馬運稅糧十萬斛赴徐州時監收內官拒弗納  
丞惶遽無策倫儒服入見曰人謂平江伯無善謀  
果然今統十萬人治河打淺淺終不通若以十萬  
人築城浚池擴倉廩以接南運待水發運京未爲  
不可今以十萬糧委之草野設遇兵變非以資敵  
耶監收者驚悟遂納之合其慷慨抵掌談言微中  
能使八傾聽類如此先是周文襄忱巡撫江南病  
征輸無法倫獻策立水次倉民以爲便倫在文襄  
幕府垂二十載文襄欲以葉宗行例薦辭不應暮  
上海縣志

卷之十

空獨行

年家居猶憫吳淞浦滙淤塞歲比不登上書請疏  
濬知府葉聘倫經紀其事以通潮洑此亦布衣之  
豪也家美園池竹木人稱爲園上張云子齡舉鄉  
薦

顧定芳字世安英之孫邑茂才博學多藝尤精于醫  
夏文愍言禮重之世宗召爲御醫問用藥之道對  
曰用藥如用人又問攝生以清心寡欲對上嘉之  
曰定芳非醫也儒之有用者進脩職郎致仕父母  
疾以口續食以體藉臥爲閭孝故邑令鄭洛書受



三喪未舉定芳躬至其鄉市地葬之復歲賜其子其好義樂善率皆類此子從禮字汝由少隨父客金陵時夏文愍言遊學困頓從禮齋贈三百金後言大拜薦從禮題十三廟謚號穆宗登極又題世宗神主先後被殊賞自中書兼翰林院典籍歷官光祿寺少卿致仕夏公論死西市親舊莫敢視從禮收歛歸葬徐文貞稱之曰不悖德不邀利真義士也性至孝友兄弟六人同居共爨喪祭一遵古禮上海困倭寇始議築城從禮發粟四千餘石作

上海縣志

卷之十

三 獨行

小南門以爲倡又置義田以助里役卒年八十四弟從義字汝和善書能詩選授中書舍人隆慶初以預修國史成擢大理評事家構玉泓館手摹宋本淳化帖多藏法書名畫金石鼎彝又善繪事工署書爲文徵明王世貞父子所重有硯山山人詩稿行世

陳一鳴本朱姓字起靜爲人剛介有以張某口語嫁一鳴於令所或勸其援張自解一鳴卒不自白少從父宦遊以詩受知於分宜嚴嵩後應貢入京顧



定芳言之嵩嵩曰非曩時相唱和人耶其驚人語我猶識之可令若來見定芳以告一鳴曰余顛毛種種矣詎能脅肩搖尾博好官耶竟不往會有鄉人居銓曹故欲借所親示公者一鳴遂不謁選而歸養母終其身無悔志

蔡紳字朝卿由明經教授南昌貧士以束脩士者必却之有名家子以家難陷大辟紳寃之力陳當道得白卒成名士弟繡亦以貢爲臨淄訓導以子懋昭貴封奉訓大夫學問該博時號書厨以北南齊

上海縣志

卷之十

奎 獨行

陸澄云

姚昭字如晦世業儒而貧讀父遺書輒嗚咽流涕事母孝開門受徒師道嚴重有撫臺某行縣詢諸生以民窮財盡宜何如處昭進曰民窮財盡誠如明公言聞明公進羨餘二千金以助大工安所得羨餘也撫臺愕然徐曰懃哉此生因偃蹇場屋賦老將詩以見志聞者壯而悲之躬課五子同爲諸生人稱姚氏家學及卒門人私謚爲孝廉先生所著有留耕堂稿



張泮號致齋嘉靖甲辰貢生廷對第一性至孝事二  
母以色養咸得其歡心沉毅慷慨急人之阨撫弟  
子如已子凡族屬之不能舉火及外父山氏之貧  
者皆賴周給有喪則力殯之如禮徐文貞嘉其品  
行招入中翰之選固辭不就嘉靖癸丑倭寇猖獗  
當事議築城捍衛泮散財畀役身親畚鍤手口盡  
瘁遂病不起所謂以死勤事者崇禎丙子里人擴  
其行事上學使者檄縣崇祀鄉賢子令德孫元玘  
元龍先後皆以科名顯

上海縣志

卷之十

畚獨行

喬鏜字子聲性質直好義樂施嘉靖癸丑倭寇內地  
巡撫蔡克廉檄鏜築海上護塘九十里捐貲倡始  
兩月而塘成又散家財輸官城川沙堡塞窪口以  
防賊船收泊巡撫御史周如斗委募土兵二千人  
訓練勦寇多所斬獲鄉人賴焉同時有盛濟時亦  
募兵保護新場鎮赴敵善戰號盛家兵後錄功爲  
百戶辭以資選北城兵馬指揮轉山東青州府通  
判致仕又潘元亦募兵設伏伺倭到輒擊殺之未  
幾卒功無表見三人者並太學生張宗伯龍作三



太學傳誌其事

李昭祥字元韜嘉靖丁未進士授蘭谿令俗生女率不舉昭祥令民間育三女者復其身遂無棄女者擢至工部郎中會丁父艱歸隨乞休致昭祥性至孝八歲喪母哀毀如成人嗣父塋爲沙縣簿坐事走數千里訟其誣得白友人唐志大歿而家貧迎養其母撫其諸子宋堯咨客留都死歿而歸其喪置義田五百畝以助里徃饑疫又埋掩胔骼其施惠類如此所著有澱陽雜稿慎餘錄龍江船廠志

上海縣志

卷之十

六 獨行

讀史一得棲雲館集總若干卷弟得祥子容春舍春皆以孝友稱從子伯春自有傳

李安祥字元定當倭奴入寇據柘林出掠沿浦父堂倉卒走避竟爲所獲驅負擔歸安祥聞之徒跣奔救日夜涕泣抵賊巢求見跪訴願以身代父忽從衆中望見父子悲啼不止賊哀而舍之已而一賊躍上船出令箭插安祥頭釋之時安祥已爲諸生學使者耿定向旌其門曰至孝後登萬曆乙卯賢書出知滄州子南春孫繼佑俱領鄉薦



喬洪字伯舒力學攻文孫令渭下車校士讀洪卷嗟賞不容口時召洪促席談文或請洪關說洪面發赤謝去渭聞而嘆曰喬生豈徒文章士哉益禮重之養二親力具甘旨妹早寡收卹于家竟成其節授徒至二百餘人貧者却其脩脯

朱一德字士隆六世祖木有詩名一德篤學醇謹適館拾遺金俟于路側頃之一人號泣至曰吾父逋官錢繫獄故賣妻贖之不幸失去遂還其金萬曆戊子舉於鄉僦寓應天夜有艾婦卽之燃燭待旦

上海縣志

卷之十

奕獨行

昧爽輒徙寓居郡城南二畝見有無主屍骨捐田瘞之里中謝某陷大辟一德白其寃出之其人感恩厚報不受一錢其廉潔自好類此歿後貧不能襁緝紳爭賻焉

黃椿字廷茂銘之五世孫也性孝友每出雖近在數里外必預飭甘旨始行父母病越兩月衣不解帶疾革論之金飾曰佐汝喪葬費椿營葬畢悉出所貲分諸昆季兄早歿育其遺孤而爲之娶共爨五十餘年弟老無子攜數百金寄椿所逾年來索忻



然歸之人稱長者

余采字元亮號竹臞方正學八世孫革除間隱方爲  
余避居上海剛毅有志操不能容人之過亦不妄  
取人一錢後生望之如嚴師一大吏至邑令學博  
執禮甚恭采視同平交不爲屈嘗與一生同舟卒  
於道采出資含殮還其喪終不責報晚年以明經  
教授江右閩粵師範嚴肅所造就多名士

楊鈿閩左健兒也嘉靖丙辰五月朔倭寇圍城鈿守  
陴至十七日四鼓賊窺守者倦舉梯登城邏者覺

上海縣志

卷之十

七 獨行

之大呼鈿驚起急以矛刺之鈿墜賊亦墜城上矢  
石如雨下賊退渡濠溺死者六十七人遂解圍去  
閔電字起光素有膽略時倭寇猖獗客兵來援者輒  
挫衄電乃與潘元孝倡義團土兵千人自將之屢  
與賊遇多所斬獲後戰于新場鎮衆寡不敵歿于  
陣

盛坤九團里人嘉靖癸丑日本犯境坤負母出走爲  
寇所獲坤泣告曰殺我縱母死無憾寇義之舍去  
母顧得危疾夢神告之曰鵝血可治坤驚起私念



曰鵝我聲近遂刲左臂血投之沸酒進母食之立愈復病刲右臂如前一日母思食蛤時沍寒坤求之不得逢老嫗指使東乃東走浦濱得數升以進其孝感如此母卒廬墓三年云

張同文字從道母孫病瘵百方不愈嘉靖丙戌三月朔同文禱天刲左股肉一臠和羹以進母食之病旋愈其刲處無血亦不作楚人以為孝感

陳時熙性孝友父遇倭寇將刃之時熙哀請身代得兩釋後父病刲右股調羹以進父遂愈

上海縣志

卷之十

孝 獨行

王節素業農嘉靖辛酉父病危甚節以刀割左股肉作羹進之病旋愈楊豫扁其廬曰白華遺響

陳理字良玉少受詩於潘恭定恩有令譽性坦夷不設城府家素饒藏金悉歸兩異母弟兩弟時挾母齟齬理沒齒無怨怒邑令敖選少許可獨造請理為鄉飲賓邑人余采曰邇鄉飲如酒肆安得盡若人為伍也理終不赴郡丞鄭復亨旌為耆德

胡芳字汝載事從母至孝母疾芳不解帶者逾月中掃廁踰皆親為洗滌家無擔石而好給宗人之不



能舉火者一日肅衣冠行市中其族弟耻衣敝編  
亟走避芳呼而語之曰人患行不完豈耻衣破耶  
解衣衣之以貢爲武昌丞監司重其清操擢昌化  
令過金牛驛題曰金牛豈是無金地只有夷齊不  
動心尋自引歸與樵人牧豎放浪隴畝間長於詩  
歌聲調逼古

喬一琦字伯圭方伯懋敬子少任俠膂力絕倫好走  
馬擊劍又工書善詩稱爲文武才萬曆間任遊擊  
將軍殉滴水崖之難邑人立祠祀之

上海縣志

卷之十

充獨行

張秉介字子石中丞鶚翼之季子也少警敏性至孝  
侍兩親雖酷暑不解帶父病劇中夜祈禱願以身  
代及歿投地擗踊旣哀毀遘疾猶設奠室中據牀  
微作拜跪狀嬰嬰若兒啼氣不可續遂卒年二十  
九天啓初孫泰階疏聞于朝建坊旌表

顧元啓字子賢少補弟子員壻貴家以清謹自持嘗  
讀書外舍有隣女目挑之元啓倉皇閉戶薄暮女  
復私就其寢處元啓怒起亟呼侍者燃燭有魯男  
于風里中告急者倒囊貸之貸而不能償輒焚其



券卽前負者復以急告貸之如初人稱善信云  
奚欽字聖功有鄉人負其金往責之固留欽宿而餽  
其女出見曰吾力實不能償願以此女侍欽拂衣  
起排闥出走宿友人家至夜分大吐旦視之有蟲  
如髮數百欽素病瘵是後遂愈又嘗還道拾遺金  
多隱德

周應文白沙里人家傭也三歲失母其父鳳育之廿  
載萬曆丁酉秋父患心疾危篤合門長齋欲往謁  
普陀大士丐方救父遂出剗開心胸深濶各三寸

上海縣志

卷之十

孝 獨行

餘卽投海漂二十里水至頸而不沒至柘林有盤  
石遂坐其上所開竅若拆榴連晝夜不饑亦不覺  
痛會百夫長吳某亦以母病從普陀乞方還舉以  
授文文欣然還家以剗肉血和藥進父服之其病  
立止唐進士之屏爲作孝子傳

曹誠世業醫診視有神解投以丹膏病者立起爲人  
敦樸廉介倭亂時避兵五里村有川沙人失所携  
金惶急欲死誠獲之立還無矜色一夕命其子同  
宿藥肆指一囊曰此頃所拾路傍物也若就內臥



倘失者來何從知之晨起果有諸暨紙賈行泣而  
覓於道詢其故卽還之誠少時曾還遺金於廣福  
寺前交稱長者陳所蘊爲作守愚先生還金傳年  
九十一卒

喬在修字三餘世業儒祖未湖父仲餘及在修皆棄  
儒爲醫名重三吳時人以喬半仙稱之在修自以  
編氓終其身皂帽淡衣不儒服居父母喪病家迎  
之診視先日吾不以醫故易服過祖父墓道雖昏  
夜大風雨必肅拜而去醫不責酬有所入以分宗

上海縣志

卷之十

七 獨行

族孤寡無依者嘉定令萬某病且殆諸醫束手在  
修治之立愈令德之屬富人踐更求脫者以五百  
金爲壽在修拂然謝却之其人卒就役萬令益大  
義之猶子之文舉於鄉在修謙退自如窮簷僻巷  
延請無不往病有疑險者積日夜以思精求其故  
輒欣然曰得之矣侵晨叩病者門與之藥無不應  
手愈其醫之神妙如此肅賓介者四旌善人者三  
卒年七十五子 俱能世其業云

周明璵字叔魯太學生端重不苟初無子諸弟爭嗣



者破其家明璆置不校後舉子三人亦厚德之報云

郭良俊字少谿其先廬州人以軍功世襲錦衣衛千戶後徙居上海之壘河少喪父以孝聞慷慨明大義嘗適野拾遺金堅坐以俟凡三日不獲遂以所拾金并益已資建石梁於廟涇民不病涉卽名廟涇橋中子繼周甲子應天舉人

國朝

曹六龍號南叟年甫十二善屬文侍御喬古崗作序

上海縣志

卷之十

七 獨行

弁其首士林膾炙自爲諸生八入棘闈數奇不遇因開門授徒學成取科第者甚衆事親能色養家業悉推讓諸弟無所私郡縣累舉鄉飲子垂璨丁亥進士孫泰曾戊午舉人

張尚文字從周上海人英敏好學父遊京洛卽能拮据養母咸稱其孝姊寡弟亾撫諸孤不異已子門庭整肅慷慨好施遊太學有名少時東鄰有窺宋者拒不納人或稱之蹙然曰我未嘗有此也一日載布入郡見其叔官逋窘辱卽舉舟與之無矜色



平生陰德多類此舉鄉飲賓祀婁邑賢祠于淇能  
世其德孫集成康熙丙辰進士

吳定字澹菴由太學生順治辛卯貢入廷試除澄城  
令時邑寇盜充斥積逋重累九年凡十易官定務  
以德化民計擒賊首勸農墾荒建水東書院延師  
課士攝韓城邵陽篆俱有惠政治澄十一載遷行  
人四爲 詔使擢比部校正律令出督夏鎮河道  
增築湖堤三百餘丈司馬王公稱其精明廉幹勒  
碑獎勵假歸杜門著書周貧乏設義渡禮嫁張氏

上海縣志

卷之十

三 獨行

孤女人高其義輯有河渠志子開封大理同知子  
璣縣令

朱紹謨字銘範幼失侍事後母以孝聞及父母相繼  
下世家益貧負土營葬得疾遂棄書學圃築梅花  
別塢自榜一聯云志清不必嗤人濁酒熟從教共  
客歡其寧澹如此同祖弟紹鳳時在諫垣長子廷  
獻領庚子鄉薦紹謨謹飭奴隸弗闌與外事課耕  
織如常廷獻以墨誤里居勸勉益力以故益肆志  
力學至己未登第適紹謨八十壽辰錦衣奉觴鄉



里榮羨後兩舉賓筵遜謝不赴終身不履公庭口  
無莠言身無畸行又性耿介善規人過如東坡先  
生云喉間有物必吐出乃已里中皆嚴敬之

孫士範字洪修性寬和慷慨好義事寡母五十餘載  
孝養喪葬盡禮撫猶子如已子歲饑出粟賑濟穿  
義渠修學宮三黨待以舉火者甚衆崇禎十七年  
巡按御史周元泰題給冠帶舉飲賓卒祀鄉賢子  
大經國子博士

陸恒穎家貧至孝母梅氏病絕粒數日恒穎哭禱竈  
上海縣志

卷之十

三  
獨行

神割股和藥以進母卽思飲食病尋愈

王檄性寬仁急公好義邑有重役人爭營脫檄挺然  
曰徃役義也可累貧弱乎遂身任之又助貲濬吳  
淞江歲饑出米助賑邑令旌之孫明允有學行子  
懔順治庚子舉人

沈朋慷慨好施歲饑出粟賑貸後悉焚券終無德色  
子製僉運京漕米蕩散無補與家人哭別登舟夜  
泊黃河颶發中流一舟呼救乃舉米盡實製舟及  
旦物色前舟不得卽以其米上之人謂好義之報



孫從教以孝聞又能賙卹親黨里中稱之

孔貞民至聖六十三代孫事父母及後母俱孝親喪  
廬墓三年人咸稱爲孔孝子子尚贊孫胤貞世守  
家法孝行不衰

高維岳周浦鎮民父高恩好義樂善明萬曆十六年  
歲大稔作糜賑饑所活甚衆十九年海溢恩收葬  
溺屍無算又重修鄉約助造濟農倉不惜破產入  
多其義維岳幼有至性父病危籲天求代割股手  
調以進奉母如父親歿後各廬墓三載明巡按御

上海縣志

卷之十

七五 獨行

史陳某王某皆具疏題旌

本朝巡按御史李某亦賜粟帛以旌之子象辰孫廷  
亮俱庠生同時又有杜啓賢朱養豫臺使並旌爲  
孝子云

丁守安周浦鎮農家子也順治十年母諸氏病篤守  
安割左股調羹以進母病尋愈逾年父務輿暴疾  
瀕死守安復割右股療父後父母各享年八十餘  
兄弟四人友于無間壯年喪妻終身不娶鄉黨以  
篤行稱之



夏汝法本上虞人遷居上海事父母盡孝順治六年  
大疫一門染病母思生魚汝法扶病冒雪求得之  
以供妻何氏憫姑齒落以乳哺之及兩親歿汝法  
間關扶襯歸葬子廷彥亦割股以瘳父疾邑人目  
爲世孝云

張政義甫生喪母祖母郭氏撫育之後郭老病危篤  
政義割左股肉作湯飲之立愈享年八十三而卒  
談柱杜行鎮人母趙痼疾醫禱無效柱割股食之復  
甦

上海縣志

卷之十

七美獨行

王承庚字丕佑原姓羅由順治戊子副榜貢授朝邑  
令有惠政尋遷滄州知州性孝友事親色養兄弟  
白首相携尤耿介不欺暗室初館於鶴坡孔氏夜  
有一女子冉冉而至叱之忽不見晚年棲心禪悅  
爲邑耆宿云子輅歲貢生候選教諭

陸弘濟字天如世居埭石橋性篤孝力貧色養友愛  
諸弟父廷相緣族難出亡弘濟窮山極谷走覓五  
載無踪血淚頻枯因卜地墓二母以衣冠主穴力  
任塋費又拮据塋叔孀之喪還金者再精岐黃術



不再娶至放生賑獄施藥助棺歷年無怠又梓先  
正訓典鄉約諸書自擇歸道山之期沐浴端坐而  
逝子二長柱國府庠次定國邑庠

按志例生不立傳有俞九思者父允和臥病七十  
餘日九思籲天求代亦七十餘日而父病頓痊又  
色養十五年其孝行可嘉附識以俟後之采志者



文苑

宋一人

儲泳字文卿號華谷居周浦有詩名精于陰陽五行通儒玄理所著有祛疑說人爭傳錄弟滄字智卿號晴谷亦以詩名

元七人

莊肅字恭叔號蓼塘居上海之青龍鎮仕宋爲祕書小史宋亡棄官放身海上性嗜書聚書至八萬卷手鈔經史子集山經地志醫卜方技稗官小說靡上海縣志 卷之十 文苑 并不具書日以甲乙分十門至正間修宋遼金三史詔求遺書命檢討危素購其家得五百卷所著有藝經畫斷餘譜傳於時

王太初字古心通易有貴土集漁樵稿筆錄行世陸侗字養正詩典瞻豪邁尤善題咏景物往往出人意表同時若王派趙鎮殷汝舟姚玘俱能詩文汝舟尤長于經學

王文澤字伯雨別號梅泉譜稱王茂弘後家華亭風溼後遷上海祖大言父京並有文章文澤學尤富



下筆不襲前人一語所交多當世名士累舉不第  
爲府學訓導所著有尙書制度圖纂三卷自立齋  
詩文十卷

唐時措好學能爲古文詞嘗卽文昌祠作古修堂以  
便學者講習元初爲儒學教諭

任暉字東白吳之著姓也祖仁發歷官都水監父子  
文又由祕書監遷考城令暉喜文史善賦詩脫去  
凡近雄健有法度與楊廉夫游嘗邀至其家校讐  
詩章累日廉夫極愛重之有東白集

上海縣志

卷之十

夫文苑

彭汝器字宗璉號素菴博學有史才嘗評宋史謂杜  
后遺命立太宗與宋宣公舍其子而立穆公同貽  
亂于後貝瓊爲撰筆議軒記濞許其識古今得失

大義云

明三十四人

王掖由明經任邑令有著作行於時

朱木字楚材治易工辭章士多執經及門者所著有  
靜翁集靜軒行稿子元振有壽梅集文待詔徵明  
爲之序



諸傑字子興由儒士中進士官至尚寶少卿日閉戶  
蒐獵墳典尤嗜左國撰造必求其肖尤耽苦吟一  
時寡和凡鉅公誌狀得出其手爲重遇名勝處題  
咏極多

董紀字良史父成有詩名紀詞翰俱美凡賦咏一出  
輒膾炙人口與袁景文陸宅之吳子愚輩齊名洪  
武初舉任江西僉事尋引疾歸所著有西郊笑端  
集

王弇州曰良史爲國初詩人我絕愛其海屋詩

上海縣志

卷之十

七九 文苑

如過橋雲磬天台寺泊岸風帆日本船

大雅集載題友人山居詩云煙蘿寂寂蔭柴扉  
路入蒼苔一徑微江燕定巢來自熟巖花結子  
落還稀修槩有制先抄譜沽酒無錢更典衣采  
藥山童終日去夜淡常與鶴同歸

顧或字孔文舉明經爲鄉邑訓導詩文豪整奇麗有  
古作者風與錢鼎賴良結詩盟雄于元季嘗顏其  
齋曰審安梧溪王逢爲賦揭坐左右累官至戶部  
侍郎



或學于王逢以詩名元季時稱其雄傑有客夜  
詩云露下碧梧白風生玉籟幽關河今夜客天  
地十年秋鼓角悲新鬼衣冠憶舊遊都將周顛  
淚灑徧黑貂裘

陶振字子昌明洪武初爲吳江訓導上紫金山金水  
河賦二篇太祖嘉之所著有鈞鰲集

錢驥字子良以儒士舉任晉府紀善工詩文所著名  
砥齋集

沈瑜字廷美明成化初以舉人預修英廟實錄授中  
上海縣志

卷之十

全 文苑

書舍人遷尚寶司丞弘治中遷少卿陞南京太常  
寺少卿卒賜祭如例瑜美姿容善談論文藝政事  
有可稱者以重聽故不獲擢用云

曹豹字文蔚弱冠充邑踐更遂發憤力學舉弘治己  
丑進士授邳縣令立社學毀淫祠秩滿奏最內召  
將以臺諫處之會卒邳祀名宦雅好吟咏有山居  
雲程二稿

章瑾字公瑾莊敏公燾之後徙李墟能詩草書法二  
王尤長于畫爲人有高致其畫或頃刻可就或數



日不著一筆益張可觀以後一人而已

談承儒字元珍嘉靖壬午舉人力學不與世事晚爲  
衢州司理卒于官宦囊如洗人共惜之所著有且  
適園稿

石英中字子珍邑令鄭洛書有人倫鑒一見稱爲異  
才曰此盧駱再生也弱冠成進士授刑部主事意  
氣豪舉千萬言援筆而就以嫉惡憤發及于難其  
古樂府紀夢七宣等作含譏隱刺類鄒陽枚乘而  
綺麗風雅逼司馬長卿嘗自評其文如坡公所謂  
上海縣志

卷之十

全 文苑

赤手捕龍蛇者其胸次可槩見矣所著有石比部  
集行于世

張武字德勇飭躬力學授徒自給潘恭定恩其門下  
士也以貢謁選少宰霍韜奇其文署名第三例授  
司李武雅不樂刑名請以師儒自效遂授弋陽王  
府教授上保祚箴鑒古錄濼見嘉納尋引歸監司  
交檄挽留不得諸宗室相率贈遺一無所受家居  
惟以著述爲事有城南稿讀史漫筆行於世子大  
魯令永城禦流賊有功語在王元美志中



高企字進之別號西棲居唐行鎮年十七喪母在姑蘇求吳文定公墓文以葬文定奇而與之企顧文倍清高弟也論辯英偉邑令鄭洛書嘗稱之曰高生經明行修思齊古人聘修邑志年八十餘能躋山絕頂又三載卒

顧斗英字仲韓尚寶名世子也少負雋才磊落不羈窮服饌聲色之美選勝宴遊座客常滿名園畫舫花木圖書古尊罍畢具與華亭莫廷韓風流文采相頡頏人稱雲間二韓錢謙益嘗摘仲韓麗句以爲若入廷韓集中便堪壓卷子昉之亦工書翰能詩

上海縣志

卷之十

全文苑

李繼佑字仍啓才情奔放卓然自成一家言與父南春先後舉于鄉所著有初學集

楊學禮字伯立少與陸文裕淡齊名中歲以病廢與曹弘濟滕奎結詩社日相唱咏有寄陸文裕秋興一律云風物蕭疎兩鬢絲感懷常在夜淡時心灰未冷金猊熱首級無功鍔馬悲杜宇敢言遊子怨芙蓉空帶美人姿山家亦有陽春調不與多才朱



玉知詞林莫不稱賞自作生誌書銘旌

黃標字良玉藏書甚富緝閱無間樂暑印之如指諸掌陸文裕公臨文有疑義必屬標考核與人談經濟鑿鑿可行輯古今說海一百四十二卷選陸文裕集一百卷所著有書學異同二十二卷縣志稿十卷俱燬於倭惟戊巳庚子二稿尙存

張榘更名敏中號璞齋其先汴人八世祖鐵一公卜居龍華里子孫因家焉嘉靖甲寅由明經教授仁和公司倭寇薄城當路檄屬員之才請者分守榘得上海縣志

卷之十

全文苑

艮山諸坊李生從督士卒捍禦城賴以完遷王府教授年八十卒于家

李煥然字子文長史伯璵曾孫家富于書研討庵貫時號爲書鹿絕意進取教授里中祠部張烈司馬蔡汝賢其高足也弟復科仲子名可教以廉讓稱孫逢申工部郎中

朱察卿字邦憲福州守豹子幼敏慧稍長厭薄經生言思砥行立言爲不朽業邑令黃文煒郡司李陳懋觀成禮重之察卿謝避無所關通及黃陳相繼



物故察卿爲治棺殮經紀其妻子歸葬生平任俠慷慨倒篋無吝容其文法東西京詩法開元以前諸大家卽從著脫稿猶令人詆訶務當乃已卒年四十有九著邦憲集子家法壬辰進士歷仕有惠政孫長世自有傳中子家聲少負儁才工爲詩有春草芳草二編至今膾炙人口云

董宜陽字子元大理卿恬子工詩賦古文詞詩法高岑晚嗜元白文效先秦兩漢兼善楷書行草日坐一室手不釋卷所著有琬琰錄雲間詩文選先哲

上海縣志

卷之十

八  
文苑

金石編近代人物志中閩記雲間百咏松志補遺上海紀變諸書又按宜陽與弟宜旭析產時爲文泣告先祠義讓田產更稱有薛包之誼云

張之象字元超號王屋萱之孫鳴謙子少穎異曠達不羣於一切世榮意殊易之屢試不第乃專力治古博綜羣籍成一家言詩爾雅冲澹興寄寥遠文出入東西京不屑爲晚近語海內學士大夫無能傲屈之者晚從祿仕參藩幕性偃蹇不能脂韋遂投劾歸閉門却掃斗室中圖史羅列至不能布席



邑令顏洪範聘修邑志所著有剪綵翔鴻聽鶯避暑題橋倚闌擊轅佩劍林棲等集所輯有太史史例史記發微唐詩類苑新舊注鹽鍊論唐雅回文類聚等篇又作叩頭蟲賦寓譏邪諂尤關世教云子雲門孫齊顏曾孫蓋臣先後俱登鄉薦以文學知名于時

張所敬字長輿世以孝友詩禮禪其家學少有文譽與陳太常所蘊輩齊名司寇王世貞見其所爲古文詞絕推重之邑令顏洪範聘修縣志纂輯之功上海縣志

卷之十

文苑

居多焉

高洪謨字九畹舉萬曆壬午順天鄉試第一由太平教諭遷穀城令有善政旋謝事歸當在穀城所獎拔多名俊識方岳貢于髫年及岳貢來守松江洪謨已歿展墓修敬焉

戴士鰲字樺龍後更名畹芬耽嗜典籍少從父遊京師年十五遂以博洽名尤精三禮郡人治禮者必從講授至今曲臺業宗戴氏云數奇不遇年四十餘貢人太學爲廬州府訓導甚有聲望屢薦當選



會崔呈秀巡按江北士鰲無所餽遂扼之轉湖廣漢陽府教授棄官歸明崇禎二年起爲衡王府教授以老辭長史三移牒徵之乃赴潞見禮重踰歲謝病歸年七十三卒所著見藝文中

范文若字更生初名景文明萬曆丙午舉於鄉與常熟許士柔孫朝肅華亭馮明玠崑山王煥如五人爲拂水山房社以奇文鳴一時已未成進士除汝上知縣以嚴察爲治改知秀水案牘之間不廢文翰再調光化意不自得或兼旬不治事扁舟往來

上海縣志

卷之十

八六 文苑

江漢間以釣筒詩卷自娛遷南京兵部主事爲考功中傷左遷稍移南大理評事以憂去官卒年甫四十八文若美姿容工談笑雅慕晉人風度好爲樂府詞章識者擬之湯臨川云

喬時萬字處後治毛詩有盛名進士時敏時英同產兄弟也時萬獨數奇不遇乃閉戶著書初選詩藝詩苑旣選鼓吹皆紙貴四方尤長於古文詞選八大家七才子等集數教授生徒如張元玘元瓏朱在廷皆致通顯邑中推爲耆宿云



王昌會字嘉侯明萬曆乙卯舉人屢試不第遂絕意  
進取杜門讀書太守方岳貢欽其風聘修郡志昌  
會固辭陳徵君繼儒作書勸駕乃就志中賦役鹽  
權諸大條俱出其手晚年築室淞原門無雜賓廣  
堂弘敞前列圖書後陳女樂每花晨月夕卽開樽  
宴賞條然物外時論賢之年五十八卒所著有全  
史詳要諸書見藝文志弟昌紀字永侯幼穎敏讀  
書數行俱下手輯十七史四十餘年足跡不履闈  
闔時稱王氏二龍云年八十六卒昌會子灝亦以  
上海縣志

卷之十

文苑

文名今頴修邑乘

喬煒字赤餘副使木冢孫父拱宸起家中翰贈祠部  
員外郎煒恂恂雅飭不以門第自高少好學有名  
士林以副榜貢入北雍會開史局高選名彥煒首  
與焉歷掌制誥直起居纂修玉牒授內閣撰文  
書舍人晉禮部儀制司主事尋轉員外郎郎中煒  
恪恭閎慎爲少師葉文清向高所深器居鄉以孝  
友著聞子舒爲諸生以文翰能世其家

徐天麟字退谷明崇禎辛未進士幼孤好學年三十



餘始爲諸生及官南京兵部郎中蕭然如寒士以終養告歸唯與二三故人引滿長嘯詩文伉爽有奇氣所著有西郊草堂集廣蔭軒雜咏行於世

包爾庚字長明生而穎慧幼時見兩兄習舉子業携筆墨坐花下構文塾師見之驚異及長天才艷發試輒冠軍遂得選貢崇禎丁丑成進士守羅定州有善政行取入都遭祖母喪不赴國初隱居青谿之曲自號宜壑居士閉戶著書詔舉山林隱逸當事強起之以母老力辭康熙元年太守郭廷弼禮聘纂修郡志臨終端坐高吟曰千秋大業今家計萬里清風昔宦遊遂合掌填目而逝

陸鑰字元美文裕公溪四世孫砥礪名行於書無所不窺輯宗譜二卷文裕公逸稿十卷補刻儼山文集百餘篇隱居著書有百一詩集行世弟鏡亦敦孝友工詩古文

陳正容字威玉崇禎己卯舉人行己端慤問學該博授徒著書文名籍甚所著有欲報堂全集孟子合評陳子說詩行世



國朝 八人

朱錦字天襄幼穎異爲諸生時以文章雄視儔輩順治辛卯舉於鄉己亥會試第一人選翰林院庶吉士益肆力於經史服食不異寒素晏如也十八年同考禮闈得人爲多旋以母老乞歸養杜門却掃與人無競無聲色游冶之好時人服其雅量初錦將應會試適里中貧民鬻其未婚婦於伎家錦聞急持金贖之或謂如資斧何曰我行可緩此女一去卽墮落矣卒完其配先是夏雷震城東門知縣

上海縣志

卷之十

文苑

陸宗贄卜之云當有大魁天下者命鑿龍門二字於城垣以識之已而果然錦天資醇謹砥礪名節雖仕不大顯後學宗之年五十四卒有藜照堂詩行于世弟錚字拂鐘資敏而尤邃古學喜賓客好吟咏酒酣作歌旁若無人詩載二仲居集先錦卒喬世埴字子方年十三補博士弟子員聲望蔚起當湖呂濬襄陽方岳貢咸器重之居恒好賓客喜結納爲幾復二社耆宿九試不第卜築西郊名其園曰秋爽日與知交嘯傲其中順治十五年由明經



廷對未官鬱鬱不得志年五十餘卒所著有玉  
版陽秋十卷燕喜堂稿紉蘭草

張宸字青瑯博學工詩文由諸生入太學選中書舍  
人時

敬皇后賓天

上命詞臣擬撰祭文三奏草而

上不憚寂後屬宸有云渺茲五夜之箴永巷之聞  
何日去吾十臣之佐邑姜之後誰人 上讀之泣  
然稱善尋遷兵部督捕主事康熙六年上求直言  
宸疏請撤本邑客兵二千四百人并巡海章京以  
上海縣志

卷之十

文苑

甦民困報可邑用安堵旋罷歸病卒有蘆浦莊詩  
北征使粵草行于世

趙子瞻字半眉幼孤有成人之量及長力學通經史  
旁及天文地理諸書順治丁酉領鄉薦因主司被  
論戊戌己亥春兩蒙

祖章皇帝臨軒覆試凡自制舉義外雜試詩賦論序  
表策頌記辨說數篇拔置上卷辛丑成進士殿試  
二甲四名例授推官坐公事免閉門課子以詩畫  
自娛所著有詩集四卷詞一卷行世子維宗維圭



維炎好學能文稱濟美云

閔峻字山紆號筠庵浙烏程籍上海人幼孤事母至  
孝博通經史與處士王光承兄弟稱性命交順治  
甲午舉明經選授盧龍令廉明仁愛在官五年有  
十異政邑民樹碑頌德凡名宦康熙九年擢職方  
主事在部以廉慎稱十年督稅嶺南使還乞假歸  
里視宗親俱有恩紀而恬靜方嚴不以片楮干當  
事性無他好惟研精經籍著有筠庵詩文集及兵  
法觀略諸書王光承極推重之年六十七終于家

上海縣志

卷之十

全 文苑

子璐明經瑋康熙乙卯舉人

唐汝玫字次仲繼祿從孫幼英挺岐嶷好學有文譽  
天才高邁不讀秦漢以後書爲諸生以經濟自任  
崇禎己卯舉于鄉屢試南宮不得第乃徜徉山水  
間嗜酒好客二頃所入悉付酒家客有語及聲利  
者輒飲之醇酒不使竟康熙癸卯授常寧令未赴  
卒子士龍孝友能詩文知名于時

劉浚之字孟郊郡諸生有世德好學博古著述甚富  
舉飲賓卒年九十餘歲



彭喬年字凌雲邑諸生操履峻潔博學工文詞踏省  
門十餘次執經門下者百有餘人所著有易演究  
微詩餘圖譜子奕府庠廩生與能文孫勳庠生享  
年八十七



隱逸

唐一人

顧謙字自修其先吳郡人風神朗秀質性端敏舉明經三禮二科洞達貫穿魏帥何公表謙高才拜貝州宗城令尋棄歸隱居北平鄉名流高其風操咸就見焉咸通十三年卒

宋二人

黃庚太學生能文章尤工丹青宋亡不仕有樵吟集行世

上海縣志

卷之十

五 隱逸

任良能字子益號清逸處士讀書樂道力行孝弟能詩文省府交辟不起

元三人

余瑾居上海干山因自號笥隱生幼時夢掘地得大  
小墨數百笏遂善屬文又好游名山元至正間自  
具區道毘陵渡江抵淮泗以直言干當事者勿用  
還讀書干山下朝夕不輟或勸之仕則曰大丈夫  
當爲天下除殘剗暴否則何如抱膝坐耶世稱高  
隱



王泳字季瀾宋進士日輝曾孫元衡山主簿鏞子也  
性樂易自號靜習或問靜何習輒對曰習不由靜  
未曾學也先是奉父遺命以庶弟奉其生母泳悉  
舉田宅畀之而自處卑隘緼袍蔬食晏如也其門  
生輩爲買龍華之原營壽藏扶杖臨觀乃作歌曰  
蠶何物兮蠶是室兮吾其願畢兮抑亦二三子之  
力兮聞者多之悟溪王逢爲銘其藏曰生斯游死  
斯藏古賢達是方雖晦也孔光

蔡訓字君立元末兵亂變姓名隱吳中事定還鄉築

上海縣志

卷之十

九  
隱逸

室漢成里扁曰東郊草堂其友人江陰孫作爲記  
明三人

吳爰字翼夫以詩名於時顧文僖清稱其山林日長  
無外物以撓其志故其言蕭散閑靜無世俗綺靡  
揚袖倚市之態著有雪窻詩行於世

姚章字尙綱少厭薄舉業學詩有陶謝風書法宗黃  
魯直游學荆溪陽羨間愛其山水清僻遂移家焉  
後又至采石之紅木山布地數畝結屋棲遲年八  
十四卒葬於山麓嘉靖間觀風使者陳九德以逸



民旌之所著有玉崖集十卷

張拙字汝吉能詩善篆隸隱居不仕陸文裕浚引爲社友嘗和淡白槿詩淡擊節推爲擅場詩云懶隨宮女候羊車欲嫁潘郎鬢已華誰向上林承雨露自甘僻壤飽煙霞幽情肯許題紅葉澹影常教占白沙却笑阿嬌金屋貯寂淡恩寵不藏瑕其風操可想矣

國朝 二人

王光承字玠右貢生品行修潔力學好古綜經史以上海縣志

卷之十

九  
隱逸

及百氏書成一家言三吳推爲冠領性澹榮利絕意仕進與弟烈偕隱窮鄉躬耕養父暴足不入城市者三十餘年惟與故交閔峻校讐文籍以爲樂後學奉如嚴師然質以疑義輒謝不知也康熙十六年啓手足於友人丙舍雖夏甫之穴土室幼安之默遼海殆無以過卒無子衆悼惜之

沈求字與可秉性耿介慎取與不妄交游嘗題一絕句云一天雷雨真堪畏千載風雲漫起思留得閒身臥田舍靜看蝴蝶掛蛛絲



流寓

宋 三人

章棻字質夫其先浦城人祖頻侍御史父訪移居蘇州號曰北章棻以叔郇國公得象廕起家孟州司戶叅軍將作監簿應禮部試第一試大理評事監華亭鹽構思堂于公宇東坡爲之記有楊花水龍吟詞坡亦和之樂其風土因家于青龍之崧宅歷直龍圖閣知慶州時朝廷捐葭蘆安疆等四砦夏得砦益驕入圍環州棻先用間知之遣驍將伏兵上海縣志

卷之十

流寓

以待斬獲甚衆哲宗訪邊事稱旨命知渭州至卽上言城葫蘆河川據形勝以徧夏乃帥四路師築二城不浹月而成賜名平夏城靈平砦夏主將數十萬兵圍平夏疾攻十餘日不能克一夕遁去夏諸將皆勇悍善戰棻謀其弛備遣輕騎夜襲直入其帳執之盡俘其家虜馘三千餘牛羊十萬帝爲御紫宸殿受賀累擢至端明殿學士時章惇用事棻與同宗頗爲世所疑及進築鄯湟棻諫曰自兵興以來儲蓄一空今者正休兵息民清心省事之



時惟濠察臣言裁決斯事若更詢主議大臣恐誤  
聖聽大臣蓋指惇也徽宗立請老謝事加資政殿  
學士中太乙宮使卒封秦國公謚莊敏七子緯綜  
最知名

布衣吳惟信字仲孚湖州人寓居白鶴村記問該博  
以詩鳴有菊潭稿詩詞清遠庶幾唐風吳郡人廉  
登吟壇名宿也一日叩所作誦一絕云白髮傷春  
又一年閒將心事卜金錢梨花瘦盡東風軟商畧  
平生到杜鵑塵不覺下拜曰天才也

上海縣志

卷之十

美流寓

吳潛字毅夫宣城人侍其父寓居下砂鹽場讀書後  
魁多士爲宋開慶名相

元 五人

貢師泰字泰甫宣城人至正中自禮部尙書爲平江  
路總管甫視事而淮兵至守將莫能支師泰率義  
兵出戰不敵懷印走松江嘗寓靜安寺賦招提八  
詠其滬瀆壘一章忠憤之氣猶可想見

又詩數云貢泰甫紅蓮日湧神仙幕翠栢霜飛  
御史臺千金海上求騏驎五色雲間下鳳皇  
獵  
猊萬竈新趨轉虎豹千門舊直廬小雨挾雲行  
斷岸亂山排浪入孤城句格莊嚴詞藻瑰麗上



接大曆元和之軌下開正德嘉靖之途今以元人一槩不復過目余茲更爲拈出以俟知者

楊瑀字元誠錢塘人性警敏博學長身紫髯如畫元天曆間召見奎章閣命篆洪禧明仁二璽文稱旨署廣成局副使擢典簿中瑞司與密謀草詔黜奸臣伯顏超授奉議大夫江南盜起改建德路總管得謝來松居鶴沙鎮遂老于鶴沙初瑀在官上從容詢其鄉土對以西湖葛嶺之勝御書山居二字賜之因自號山居所著有山居新話卒返葬葛嶺王逢字原吉江陰人才氣俊爽弱冠有令名臺臣薦上海縣志

卷之十

菴流寓

之以疾固辭大府交辟皆不就會世亂客遊吳中築室青龍江上以吟咏自娛初祖母徐夫人嘗手植雙梧于故里之橫河逢追思之因各所寓曰梧溪精舍所著有梧溪集

按汪澤民曰王原吉學詩于延陵陳漢卿陳與柯敬仲俱事邵菴虞公得其傳邵菴爲時各臣柯參書奎章閣陳今爲東流尹亦躋顯仕原吉窮而在下獨以詩鳴志樂漁隱高風殆不可改

楊乘字文載濱州人少負氣博涉經史由參謀府掾累官監察御史遷江浙行省員外郎至正壬辰杭州陷無罪坐黜依青龍章元澤以居丙申松江陷



或傳張氏將起乘笈曰吾豈事二姓使果至乘知不免命子具禮享先祠畢設飲起行後圃中顧西日晴好慨然曰晚節如是足矣誨其子治畦處置家事如平日夜分就寢遂自縊遺書言死生如晝夜不足介意正以得全臣節爲快云乘死二年臺臣白其前後事贈官賜諡錄其子

葉杞字南有先世居京口有別業在松之吳滙杞讀書負才兵興進士李國鳳經略南土杞密陳時事十條李嘉納之授進義副尉丹徒縣主簿將別任上海縣志

卷之十

流寓

之而柄移藩鎮乃築草堂于魚鱗涇上顏曰漪南秘書監貢師泰爲序楊維禎魯淵爲歌詩王逢爲楚音二章以樂之遂老於松

明 九人

秦裕伯字景容大名人從父仕元就學胄監登第累官至福建行省郎中會世亂棄官寓揚州復避地松江之上海以養母時張士誠據姑蘇遣人招之拒不納吳元年明太祖命中書檄下松江起之裕伯對使者曰裕伯受元爵祿二十餘年背之是不



忠也母喪未終忘哀而出是不孝也不孝不忠之人何益於人國乃上書固辭洪武元年省臣復起之裕伯稱病不起上乃手書諭之曰海濱之口好鬪裕伯智謀之士而居此地苟堅臥不起恐有後悔裕伯拜書遂入朝裕伯博辯善談論上屢欲官之以他故辭後卒爲待制

孫作字大雅江陰人自曾祖徽川傳至作而學益大門弟子以尙清先生稱之而不名著書十二篇號東家子詞旨宏博至正中兵起挈家入吳惟載先

代藏書兩敝簾張士誠聞而廩給之卒謝去久之衆爲買田築室於松焉洪武癸丑召纂修日曆授翰林編修官乞外授太平府教授三年選學官內任除國子助教明年分教中都又明年還成均又明年陞國子司業後終於漢成里所著有滄螺集宋太史濂有東家子傳

車程天台人經行修明工古詩文

邵貞亨字復孺其先淳安人元末僑居邑西洪武初爲府訓導博通經史瞻於文辭工真草篆隸凡陰



陽醫卜佛老之學莫不究其奧所著有蛾術集  
宋克字仲溫長洲南宮里人少跌宕不羈以氣節自  
勵性伉直人有過輒面折之與人言據事析理期  
於必勝一旦謝客染翰日費千紙遂以書名章草  
久不傳至克始得其法游松江寓城東俞氏郡人  
多學其書陳文東嘗從授筆法吳僧善啓謂宋  
筆正鋒陳多偏鋒以是不及云洪武中同知鳳翔  
府卒

成廷珪揚州人避地上海淹貫百氏嘗闢萬竹樓于  
上海縣志

卷之十

百 流寓

吳滙卒遂葬焉珪好歌詩尤長于律世稱成八句  
有居竹集行世

馮淮字會東一字雪竹初居崑山安亭往來吳淞江  
上禪寺獨坐古桂下吟不輟陸文裕公浚見其詩  
請爲社會子遷濠俱能詩文裕公子楫以江上別  
業贈淮爲居父子力耕其間後日本入寇乃走避  
入城潘錄事爲分宅居之士大夫爭相迎款焉濠  
嘗以踐更匍匐公庭邑令屠隆問得其名遽令易  
服延坐濠亦傲然無所讓時人兩賢之淮有江臯



集遷有長鈇齋集邃有馮子潛詩草南游稿

董中行號念龍天啓壬戌進士初祖墓有沙走於外相者曰離鄉者貴乃移家至華亭縣有上海文學陸完龍曰是子可妻也以女妻之遂家焉初授工部主事掌節慎庫舊例宦官司鑰部臣檢查每入庫宦官必賂部臣左右得不窮詰中行正色拒之侵蝕頓清後遷營繕抑絕虛估眾嘆之遂拂衣歸亡何吏部周順昌被逮以五人擊死緹騎故人人自危無敢送者中行獨慷慨登舟捐貲助別已而

上海縣志

卷之十

百一 流寓

補都水再遷郎中督通惠河道疏濬三百餘里漕艘啣尾而上京師賴焉又宦官張燹憲總督戶工兩部尚書虛正堂待之中行挺身出曰此堂祖宗所立尚書所坐若安得踞此遂撤其坐燹憲漸沮踰年出爲浙江臬副會通州鬧壤燹憲以前恣移罪中行逮繫久乃得釋尋卒仍返葬吳縣季子宏度博學有文名亦居上海孫德其康熙戊午舉人

李贊化字與參浙之四明人敏慧工岐俞術明宗禎時以叔大宗伯李金峩薦召見武英殿賜中書舍人屢奉差江右浙直晚年僑寓上海刀圭所及沉疴立起性樂善好施有還遺金完破鏡諸事年七



十八異香繞室跌坐而逝著有萬春堂醫案行世子用粹能世其家學孫謨諸生有文名人以爲德報云

附

潘國光字用觀大西依大利亞國人童貞修道屢試高等授職傳教明崇禎十年至中國先是徐文定公得天學于利瑪竇謂與吾儒教合深信力行之延郭仰鳳黎寧石二西士歸建堂于居第之右繼至者艾思及畢今梁蒙詔特召者也及國光至重上海縣志

卷之十

三  
流寓

購安仁里爲敬一堂順治間以通微教師湯若望薦部給劄付測候東南躔度入都 陛見

世祖章皇帝欲給以俸辭疾而歸後卒于粵奉

旨老歸本墓同會西士畢嘉栢應理扶襯歸葬城南陸家浜上續後劉廻我及金百鍊皆卒于上海同耐墓焉未幾畢往秦中而栢在粵今居堂者爲張安當其學問品行大抵相伯仲所著述皆敬天修已與夫製器利用之書甚多行世



藝術

元 二人

王默字子章文澤子也身長八尺美鬚髯善談論少任俠多藝弱冠更折節讀書書法趙孟頫行筆甚捷被徵書金字浮屠經擬官翰林力辭歸求書者填戶父歿盡鬻書買山以葬

俞宗大其先河南人曾祖彬仕元爲浙江行省檢校始居上海竹岡西叔仲幾工書與宋克相友善宗大善楷法以薦授中書舍人歷吏部郎中致仕進舍人正統中歿于王事順以卹叙爲國子生仕終南京鴻臚寺寺丞

明 十八人

吳敬字孟寅以楷書生寫永樂大典書成入太學擢行在吏部文選司主事歷遷員外郎郎中九年秩滿予四品祿守本官久之擢太僕寺卿以疾乞致仕正統四年卒遣官諭祭予蔭

徐樞字叔拱初家華亭後移居龍華里其先遇異人

上海縣志

卷之十

藝術



授以扁鵲神鏡經遂有所悟父號神翁樞少傳其術明洪武末召爲太醫院御醫累有奇驗宣宗親賦詩送之子彪字文蔚亦以醫名景帝嘗問藥性遲速借人性善惡對又問攝生對以素問固元氣之說蓋以醫諫云所著有脉訣辨明本草辨明行于世

御製詩云太醫老卿八十餘胸蟠千古岐黃書  
鬢含白髮面紅玉長紆錦綬鳴璫琚光華近侍  
今三朝致恭保和功業高五花鸞誥寵先世南  
望飛雲心孔勞歸榮遂爾追遠情吳淞江水清  
泠泠春風花開景明麗待爾重來朝闕廷

張電字文光以布衣從陸文裕濬入京師夏文愍言見而奇之使書御製集禮序世宗嘉賞遂入史館供事皇史宬建命電題額詔賜金幣授鴻臚寺序班遷中書舍人漸被恩遇朝廟典冊必使電書世所傳消痞帖特其小者凡行幸游宴未嘗不從賜予優渥至遣攝大祀諸學士有不得比者歷遷至工部右侍郎進禮部左兼官如故電起布衣至卿



貳恭謹儉素始終不渝故受知眷最渙年五十一卒於官贈工部尚書賜祭葬同時有浦澤者字時濟亦上海人與電俱受渙書法能窮古人波磔之妙嗜酒好眠終身不娶或醉臥一二日不起時人呼爲小癡

璩之璞字君瑕楷法妍雅善畫山水兼工翎毛及水墨花竹筆致矜貴精于摹印在吳門文氏伯仲間人品高潔不趨榮利士論多之

姚蒙字以正家百曲港善醫尤精太素脉都御史鄒上海縣志

卷之十

夏 藝術

來學巡撫江南召蒙視疾姚素有風疾鄒心輕之問曰汝亦有疾乎對曰有風疾曰何不自療之曰是胎風鄒卽引手令診姚却不前鄒悟呼座坐之診視畢姚曰大人根器上別有一竅出污水鄒大驚曰此予隱疾甚祕汝何由知姚跪曰以脉得之左手關脉滑而緩肝第四葉有漏通下故也始改容謝之乃求藥姚曰不須藥到南京便愈以手策之曰今是初七得十二日可到鄒卽行果十二日晨抵南京而卒蒙臨終作謝世詞警悟超脫蓋有



所見云

俞寰字允寧樸愿沈靜喜讀書工詞賦醫藥卜筮斲琴刻篆無所不通然不求人知終歲不一入城府故人亦少知之者

陳常字用恒世業儒常傳外氏邵艾菴醫卽有名明永樂十五年遣使下西洋以醫士從歷洪熙宣德間凡三往返恭勤愿慤上官皆器重之常言海中行以六十里爲二更往返一千六百更爲九萬餘里所涉歷自占城至忽魯謨斯凡三十國臨終但

上海縣志

卷之十

真藝術

曰今不葬魚腹矣子經字宗理世其醫

喬迨家世業醫迨益精其術歲疫夢神人指示水中草云以此活此方人旦物色得之以治疫無不立起由是顯名技亦愈進子士琰字仲餘少好讀書有介操常出遊遇富家子死一日矣士琰以一匕投之遂甦其家奉百金爲壽不受晚年預營葬地作方塚自爲銘曰黔婁之死正而不足千載以下踵其芳躅不能爲圓不能爲曲覩茲方塚不知其人而知其行獨士琰有五子第四子在修字三餘



篤行長者其治病善用古方察脉精審所活人甚衆年八十餘無疾而卒

陸垞字舜陟文裕公濙曾孫濙書法北海而垞尤妍秀出入蘇米之間董文敏公其昌濙器之有二陸詞翰之目從孫濟字公謙庠生鏡子畫宗小李點染人物獨步一時所著有畫史竹譜

秦昌遇字景明少善病因遂學醫治兒疾有神效已而遍通方脉不由師授妙悟入微常行村落見婦人浙米使從者挑怒之婦人忿詬昌遇語其家人

上海縣志

卷之十

百 藝術

曰若婦痘且發當不治吾激其盛氣使毒發肝部耳日下春時應見于某處吾且止爲汝活之及暮如其言乞藥而愈青浦林氏子年方壯昌遇視之曰明年必病三歲死旣而果然其或病至沈篤時醫張口貽昌遇投劑能立起名動四方往來無寧畧然未嘗自多嘗謂法當死者雖盧扁不能爲苟有生理勿自我死之可矣爲人瀟灑自適預知死期年六十餘卒所著大方幼科痘疹折衷行于世



胡維璧字國雍工真草書法明神宗時太后給高麗  
磁青箋勅寫金剛經書成賜資有加當國者欲引  
故尚書張電故事薦用維璧固辭子訓之字無競  
能世其學凡解廟額額多出其手孫懷國稱名醫  
徐延賞字元識好養生家言因精岐黃術常熟令楊  
鼎熙病月餘徧求醫弗效延賞以三劑起之吳淞  
朱文達素無恙一日忽神思有異晚而歌笑不節  
飛騎邀視延賞曰此陰火乘肝晚動也予平劑遂  
復懸壺滬瀆間爭禮致之延賞以供其過多常奉

上海縣志

卷之十

頁 藝術

清齋又作戒殺文以勸授太醫院御醫董文敏其  
昌雅重之贈以詩曰藥倩韓康賣門容尚子過五  
茸安豹隱萬里弄鷗波子霑恩能世其業

奚鳳鳴少業瘍醫尤善治癰疽能察人氣色預知病  
日川沙副將蔣其仁先常患背疽至是復發使鳳  
鳴視之曰此昔年蘊毒故肌理墨腊也治之月餘  
而瘳膚加澤焉一日其仁弟在坐鳳鳴謂曰君不  
出三月疽發背矣及期果然鳳鳴常言癰疽中潰  
積腐四周非吮之不得盡故治病必募人以苦酒



虛口而吮之其貧者鳳鳴卽親吮之有張姓者左足拇指瘡三年不能行鳳鳴以刀破其患處抉出一蜂遽起徐步其神異類此

吳易字素友董文敏公其昌門下士書畫得其神骨文敏見之亦莫辨其出自吳手也崇禎時授文淵閣中書舍人後遊四方卒于粵

顧壽潛字旅仙尚寶丞名世孫性高介不求聞達董文敏公其昌嘗稱其畫法其遺蹟雖尺幅片縑人爭寶之所著有煙波叟詩草

上海縣志

卷之十

夏

藝術

吳泰字延之書法詩文爲董文敏陳徵君繼儒所推重著研廬稿摹董跡勒石爲帖亦以研廬名明末徵入太醫院後歸隱於郡之南城

方叔毅字百里工貌人物神氣生動常遊錢塘擔荷者竊其行李逸去乃寫其形揭之城圍見者皆曰某坊陳二也因捕得或謂之曰君能捐棄筆墨游心太虛僧繇龍眠可並駕矣叔毅憬然歎曰惜我少年不聞此自今請以子言爲師未幾病卒年僅四十餘



陳鯤字悟泉性強記會倭亂遂習數學尤精六壬決策奇中徐文貞公階旣謝政值張博構獄鯤占之得六儀曰其兆太陽當位羣陰乃伏有兩貴人佐之某日夜半必獲美信及期報新鄭被逐夜漏二十刻也張宮諭以誠未遇時鯤成數謂當大魁天下徐文定光啓姚布政永濟皆于窮困中識之後悉符合其子三省孫杰能世其學

國朝 九人

李中梓字士材父尙袞明萬曆壬辰進士中梓本諸

上海縣志

卷之十

二章 藝術

生有文名因善病自究醫理輯張劉李朱四大家所著書補偏救弊集其大成金壇王宇泰亦精于醫年八十患脾泄中梓診視訖語王曰公體肥多痰愈補愈滯法宜用迅利藥盪滌之乃用巴豆霜下痰涎數升頓愈又魯藩病時方盛暑寢門重閉床施氈帷懸貂帳身覆貂被三重王猶呼冷中梓曰此伏熱也古人有冷水灌頂法今姑爲變通用石膏三斤煎飲作三次服一服去貂被再服去貂帳服三次已盡去外圍體蒸蒸流汗遂愈其神効



不可枚舉然素自矜貴非富貴家不能致也年七十餘作偈端坐而逝有道火錄居士傳燈錄醫宗必讀願生微論內經知要本草通玄傷寒括要等書十六種爲後學津梁其診脈要訣口授門人董宏度其餘及門甚衆多知名于時

張兆龍字震獅事父母至孝及長業醫洞曉素問能決死生工導引邑中稱神術焉年八十無疾而終子天衢天樞世其業

曹六韜字君略太醫院吏日貫徹醫理屢起廢疾遠上海縣志

卷之十

聖業術

近延治無虛日年七十餘卒子孫繁衍積德之徵葉有年字君山嗜繪山水探奇造勝足跡半天下得名山大川之助筆墨愈工董文敏陳徵君俱推重之明肅藩聞其名禮聘至秦有年爲繪圖築苑名勝甲于八郡後歸隱石筍里四方爭購其畫無虛日卒年八十葬于佘山之麓

曹揚廷字楚石幼習經史改業岐黃其診脈用藥獨有神解故所投立起爲先達董文敏公所器重明時禮部劄給冠帶榮之子文倩及孫會俱有文名



周官字伯元明侍御周洪六世孫也幼習舉子業尋  
喪父食貧乃去儒業醫諸方書無不洞曉而保嬰  
一術尤稱神妙孝友方嚴皆以長者目之明崇禎  
時禮部上其名給劄并冠帶榮之年八十卒所著  
有痘疹彙纂諸書行世子景榮爲諸生景新景閔  
仍世其業

童蒙亨字以行善醫凡遇疑難症候能出獨見全活  
之歷有奇驗爲人亦篤實稱長者孫玫諸生有文  
名

上海縣志

卷之十

三皇 藝術

趙儒縉字鳳亭本長洲人流寓上海祖傳醫道二十  
七世治目疾尤其所長云

顧承仁字壽卿著有幼科精義四卷知名于時



列女

晉 一人

孫氏虞潭母晉成帝二年蘇峻反詔潭督三吳等郡諸軍事與顧衆同討峻母戒之曰吾聞忠臣出孝子之門爾當舍生取義勿以吾老爲累乃盡發家僮助戰貿所服環帶以給軍資峻平拜武昌侯太夫人加金章紫綬沒復賜謚婦人生而封爵死而易名自潭母始

元 六人

上海縣志

卷之十

列女

顧氏二貞長曰中次日和顧亨女也旣字而寡中慕古貞烈操非節孝事弗語和剪髮自堅父母議婚皆不聽及卒臨川奉智題其墓曰處女墳吉安楊清爲二貞傳

楊節婦龍華人適張都水子裕生一女年十七裕蚤世楊守節五十餘年食淡茹素寢處一室里人呼其室爲楊節婦居

吳妙寧年二十一適同里張氏子越四載其父坐事罪且不測妙寧泣曰吾父苟無地爲解族其赤矣



吾不遘死禍延良人遂自經死未克葬吏果至聞  
寧死惜異而去

費元琇歸江陰知事朱道存至正間江陰亂因歸寧  
以避之未幾苗寇上海城陷元琇爲苗軍所逼攀  
堂楹厲聲曰吾義不受辱以死拒之爪入於木罵  
不絕口苗怒剗之妹元徽歸華亭陶氏年未三十  
喪夫將營夫墓命兩其窶曰一瘞吾夫一俟未亾  
人吾不卽死者以仰有舅姑俯不忍弱女耳時家  
世艱虞勤紡織以具其旨始終一節卒年八十竟  
上海縣志

卷之十

列女

遂同穴之志鄉人稱爲雙節

胡氏姚某妻陳村人十八而嫁生兒未週歲夫死族  
賂隣婦爲富家求婚胡抱兒泣曰不獲從夫地下  
有此兒耳尚乞生圖富貴耶族驅迫之度不能容  
乃乞歸父母亦憐其少如夫黨言婦以死自誓竟  
完其節

沈景新母及妻平江人至正中景新調上海吏江浙  
時苗軍逼境母謂婦曰吾家素清白義不受辱及  
爲苗所掠曰從吾不殺汝大罵拒之苗先殺其姑



縛婦髮馬尾曳殺之

明

李夫人揚州通判劉遠明女歸上海主簿李從吉年二十八夫死志不少二誨二女有法長妙貞贅唐文祥次妙堅贅沈源仲二婿亦蚤世女年皆二十餘母女相依爲命撫遺孤各成立壽皆八十餘西昌尹厚瀼東黃黼武陵顧達皆一時文士爲作三節傳及詩誨傳于世

倪妙貞漢成里人孫思聰妻生子益五歲次生倣甫

上海縣志

卷之十

三

列女

暮而夫死時年二十五哀毀骨立未幾父與弟及子益相繼死獨與母及幼子倣弟子網居母諷以少寡泣誓不從甘艱苦以存二姓之祀侍母壽終撫子侄成立人稱其節孝云

湯節婦慧信龍華人歸華亭人鄧林生一女林卒湯年二十五鄧族利其居迫使歸湯曰我生死鄧家去何歸鄧知不可奪乃買其居於巨室張湯泣曰我守夫骨於茲土與同存亾奈何棄之欲自盡張義而還之旣而曰彼惟利吾財耳乃盡以家貲還



鄧躬織紉自給時運歲大水湯居荒野沮洳中其  
女已適富林曹氏操舟迎之不許曰吾守此六十  
年縱沒溺以從汝父於地下所甘心焉卒不往  
沈妙蘭未嫁時母患心疾貧不能致醫剖脅剖肝進  
母食之遂愈明永樂間旌表之

胡淑貞山宗海妻永樂十年宗海死氏年二十七事  
姑教子守節以壽終天順初知縣李紋聞於朝旌  
爲貞節學士錢溥誌其墓

俞妙觀張文通妻高昌鄉俞奐昭女適張五載張病  
上海縣志

卷之十

真 列女

察俞屏容飾侍湯藥及夫卒俞慟絕復甦至夕自  
經死舅姑族人具大棺同殮以終其志時年二十  
有六明正統三年旌爲貞烈之門

唐淑清蔡倫妻夫亡時年二十四勵志守節奉舅姑  
以孝聞育子式堅娶侯昱女淑潤式卒撫遺腹子  
經爲儒學生亦卒始婦同心堅守鄉里稱爲雙節  
明成化間詔旌表其門

郁淑貞副使文博女嫁同里孔瑜瑜死于寇郁時年  
二十五不再嫁知縣劉琬上其狀弘治初詔旌其



門

李氏景泰間嫁同縣沈璠年二十六而寡撫孤子女成立終始一節明弘治中旌其門

陸氏名蓮周浦人嫁青龍鎮茅瓊瓊卒陸年十九二子震霆幼家業凋落乃專紡織奉舅姑隣婦罕見其面弘治中詔旌其門

康氏張掖妻掖督運邁疾卒于毘陵康年二十一懷遺腹越月子生茶苦萬狀撫育成立以衍宗祀嘉靖壬午郡人刑部郎中周珮表其墓

上海縣志

卷之十

列女

俞氏淑安新江鄉人任仕中妻年二十而寡女二歲男甫五月姑先夫卒舅宦遠方家貧無依氏斷髮自誓織紉撫孤旣而女適俞邦用邦用亦早喪或說之再適女曰再嫁誰奉俞宗祀且辱吾母乃歸與母同居守節詔旌所居曰雙節之門

張氏善才漢成里金復妻復年二十三卒善才年與之同誓死不再嫁孝養舅姑撫六歲孤成人舉動以禮五十餘年如一日鄉族稱之

陸氏沈振宗妻事姑至孝嘗割股愈姑疾里稱爲孝



婦

談氏嚴泰妻泰客死婦年十九無子而貧飲苦茹澹以養舅姑五十餘年未嘗見齒宗黨欲請旌之婦堅辭曰吾始願不及此盡吾心耳

節婦某氏既嫁夫患風癩不起舅姑謀奪以妻少子婦覺密告其夫夫泣而遣之母家遂攜筐篋去潛製喪襖衣衾夫既死家人露置棺于水濱而不闔蓋俗忌惡疾然也婦聞之卽盂飯淪鷄偕幼妹至棺所抱屍浴之歛衣衾闔棺設祭祭畢遂與妹訣卽以巾幕面投水死惜無能傳其姓氏者張汝弼傳之

上海縣志

卷之十

莫列女

戚氏王瑾妻高昌鄉人

胡氏陳伯昂妻

何氏陳彬妻唐行人

雷氏陸宗黼妻唐行人

王氏張欽妻三林里人

陳氏董瑜妻長人鄉人

許氏蔡金妻華亭人



施氏徐煦妻年十八姑有所私施每諷以義姑銜之  
謀欲敗其守施以死自固姑與所私怒且慮事洩  
擗殺之潛瘞郊西連旬雷雨震溢縣令馮彬疑有  
寃廉得之逮訊首伏置之獄時溽暑啓婦棺面如  
生人皆駭異爲作辨貞錄

顧氏李賓陽妻顧定芳女歸李三載夫亾越四月舉  
遺腹子泣曰先夫有後可死矣遂以遺孤托兄從  
禮絕粒死年僅二十一學使者趙鏗邑令喻顯科  
旌其門

上海縣志

卷之十

二  
列女

蔡氏生員沈露妻露死蔡方二十六歲求死者數四  
念姑老二子在抱強起奉姑撫幼辛勤四十年如  
一日巡按尚維持上其事詔旌其門曰貞節

王氏妙真莊銓妻也婚五年銓死遺孤世忠才三歲  
舅姑欲奪其志王氏抱世忠哭曰陰瑜妻以屍還  
陰尚病其不早決吾當死莊氏戶內卒不爲奪嘉  
靖戊申巡按饒天民廉得其實與顧嶽妻秦氏曹  
雷妻陳氏山禧妻某氏姚佐妻胡氏並聞于朝值  
倭變議未下詳潘恭定恩所著傳中



○金氏新場鎮人張問仁妻夫卒金年少毀容自矢糞  
糞撫孤白首一節詔旌其門

○瞿氏胡汝任妻太守霆孫女時有倭難里媪言及村  
落女婦受辱事瞿自矢曰吾脫不幸惟有死耳旣  
而奔竄與賊遇瞿慮不免從衆中奮擲越水婢挽  
之不起竟溺死

○趙氏秦環妻環少嬰孱疾趙時年二十二環疾革囑  
其兄璽曰婦少年無子吾死只作一壙趙聞之欲  
先夫死闔戶自縊家人驚救遂髡髮見志環死環

上海縣志

卷之十

尊列女

兄璽尋卒妻張氏亦年少與趙同誓死守兩婦糞  
然始終一節學使者耿定向巡按邵陞旌其門曰  
貞節後二十餘年族人秦鏊女嫁進士潘伯紳亦  
早寡以苦節死監司交旌其廬

○談氏推官承儒女承儒無子贅張伯深爲壻年二十  
二伯深死舅姑授以產遜與伯叔及父卒于官遺  
田數畝族人奪之或謂當訟之官談泣曰未亾人  
少不踰閭闔乃以爭產故忍耻向公庭乎歷年六

四提學耿定向巡按劉曰睿下檄旌之



孫氏鶚之女歸嘉定沈思道思道屬纊時誓相從地  
下及就木孫引刀自刎不殊死家人日夕守之潛  
吞鍼服每百計自殘踰年守者懈竟自經死明嘉  
靖間詔旌其門

沈氏太守瞿霆孫繼武妻二十一而寡家貧無子孝  
事後姑苦節五十五年提學耿定向旌之

張所敬三烈女傳 貞節義烈之事無世無處無  
之第窮陬絕壤或單門小戶履危蹈險感忿激烈  
以自引決人故無得而稱焉遂使身速朽于黃泉

上海縣志

卷之十

三皇列女

而名未列于青史余甚悲乎其人作三烈女傳三  
烈女者俱上海人其一姓包氏其二不知其姓蓋  
包之婢子云包已字于錢年二十許容甚韶麗值  
島夷之難家人各自奔竄遺三女在後寇追及之  
相去百武許包氏先赴水二女從之浮沉間寇倒  
長戈授包溫言諭之起包不爲顧自擲溪處寇怒  
以戈刺之二女子爭以身捍遂俱被重創以死死  
之地爲東鄉之橫眠距邑四十餘里方亂時其事  
不傳于縉紳故操野史之筆者不得而紀之要之



三人皆烈女也三烈女死後十餘年而余始得其  
事由此觀之世之矢幽貞堅苦節湮沒草莽而不  
爲人知者何可勝道也

金氏葛鈿妻年二十二鈿死旦暮泣血結成心疾家  
事日落營葬舅如禮人無間言事聞詔旌之

唐氏杜時官妻時官少服賈抱病將卒唐年二十三  
無子有老姑時官命之日伯氏有子宗亮立爲後  
以養其姑後賈事廢家日就貧遇歲大侵者三唐  
操愈勵年五十餘宋子南華傳其事士大夫歌詠  
上海縣志

卷之十

三 烈女

之題曰楓閨白璧後以子貴勅贈孺人

陸氏廩生陳無逸妻陳卒陸年二十三子世蕃尚襁  
褁訓子補諸生復天守節七十六年邑令屠隆旌  
之

倪氏高橋倪捕爵女倭寇上海倪同嫂奔竄猝與寇  
值女見嫂被執投水自盡寇以長戈起之諭以好  
言女以死拒寇寇怒裂其屍

陸氏適華亭徐從教避倭吳興鬱鬱不得志時有子  
益孫少敏撫而歎久之詠一絕句悲愴婉切趣客



與談若訣者客去而壁西向而逝陸上奉孀姑攜  
十歲孤以禮葬訖歸女與彭汝讓日夕嚴課子壻  
皆成名守節七十六年卒

蘇香幼字盛萬年萬年有膂力工騎射將軍喬一琦  
署爲前鋒從征遼左轉戰至滴水崖歿于陣凶問  
至蘇泣然曰若能死忠我雖未婚豈復爲他人婦  
乎遂自經死死三日面如生事聞下詔建坊斜橋  
邑人張長輿董文敏公其昌等有詩輓之至成帙  
云

上海縣志

卷之十

三十一 列女

沈氏布政使恩女歸庠生顧從仁年二十五夫亾守  
節時倭寇亂離播遷備嘗艱苦撫孤子九叙成立  
年五十卒學使耿定向旌其門

尹氏贈大學士徐緒妻年三十一緒亡子思誠方六  
歲會遭倭亂流離避難者四年寇平收合餘燼延  
師訓子萬曆間巡按御史徐元特旌其閭享年八  
十孫光啓嘗曰藉六七十年中無王母徐其泯矣  
後追贈一品夫人

杜氏張寵繼室寡居三十餘年撫前妻二子若已出



拮据婚嫁並竭心力季子夢鼎娶劉事姑盡孝又常判股肉療夫疾兩世貞孝崇禎間有司旌其門楊氏張亮臣妻生二子亮臣病歿楊誓以身殉及遺腹生男乳之勉終喪制卽托孤親族徧身紉以縞素自縊亾夫故榻前士大夫哀而誄之

陶氏楊日就妻年二十二夫亾子履泰方在襁褓毀容茹苦教子爲時名醫崇禎末有司旌其閭

本朝順治十七年奉 詔建坊

陳氏包文煥妻年二十九夫亾連遭荒歉力勤紡績孝事病姑苦節四十餘年卒

上海縣志

卷之十

嘉

列女

本朝順治四年巡按旌其門

馬氏文學喬軫妻年二十二夫亾守節七十四歲卒至

本朝順治十年巡按秦世禎疏奏旌其門

朱氏呂朝紳之妻年十八于歸二十一而寡力勤訓子巡按張鳳起旌其門

顧氏馬鳴仲妻順治二年九月時方喪亂爲游兵所掠顧義不受辱赴水死三日後就殮顏色如生臺



使郡邑並旌其烈

鄭氏幼字王景昌未婚而夫病亾鄭矢志不渝年十九歸夫家守貞三十餘年明崇禎二年太守方岳貢聞於朝詔建坊瑞安橋鄭感激國恩剖夫遺田房半給嗣子半助學宮孤貞高義巾幗中不二見者也

周氏字朱孔暘未婚夫死周長齋繡佛積貲營墓葬夫并葬舅姑如禮順治十年巡按御史秦某題旌建坊浦濱今號爲旌節里云

上海縣志

卷之十

三十一 列女

劉恭人顧可大妻年二十六而寡時有倭警村民逃竄劉守夫柩不去守節二十七年子國縉上疏陳請明天啓二年建坊日輝橋旌異之

顧氏孫可久妻年二十一夫亾苦守六十年至九十一歲明天啓四年巡按御史張文熙題請建坊旌表

張氏儒士周士琦妻生二子士琦病故張年二十有八飲血食貧足不踰閭姑徐氏性方嚴難近張先意承志得其歡心教子貽謀貽謨俱成令器守節



三十五年如一日江寧巡撫慕天顏 題請  
詔建坊旌表之

張氏毛公純妻年二十二夫死翁姑相繼歿張撫穉  
女號曰翁姑故夫俱未入土日能瞑乎乃晝夜紡  
織積貲營葬如禮年六十餘里黨無間言撫臣慕  
天顏具 題奉

詔建坊旌表

顧氏明泰昌時適夫黃龍生一子三女子殤未幾龍  
亦死顧泣請舅姑願立後守節姑佯許之而陰許

上海縣志

卷之十

真列女

他族顧聞之乃詭語姑曰新婦不得已將再嫁幸  
延吾母及鄒氏姑爲別許之及母姑至具酒食泣  
拜曰大人幸自愛長與膝下辭矣因僞起更衣入  
室門闔自刎死故進士黃淳耀爲撰烈婦傳孝廉  
張錫眉哀而誄之

張氏沈自成妻年二十七而夫歿卽爲夫擇嗣嗣定  
六日遂自經柩傍臺使屢旌其門

顧氏陸昌明已聘未婚之妻也昌明年十六夫亾顧  
年甫十三誓不改適隨詣夫家苦守十七載年二



十九正襟端坐而逝

盛氏文學董劬妻劬館于浙西姑徐氏病篤盛驚憂無策刲股作羹以進旬日病愈

鮑氏張信甫妻母病割股作湯飲之立愈

何氏名珮年十九父死母寡已字而未婚也順治二年避兵洋涇一騎突至敗其衣逼汚之何泣且罵以死拒之遂遇害母亦死越三日其所聘夫至收其屍顏色如生因同母合葬洋涇北原士民賦詩輓之且樹碑以旌其烈

上海縣志

卷之十

墓

列女

蔣氏故給事性中曾女孫也及笄歸李應曙年二十七夫亾守節幾五十年先夫未歸李時母沈病痞瀕危蔣割股療母世稱其節孝云子瓚孫良翰皆爲諸生

張氏閔元樞妻年二十九守節撫孤至八十歲病卒  
徐氏太學艾廷槐妻年二十五而寡雖家門貴盛茹苦撫孤置祀田育遺嬰周卹親黨夕行善事年七十有七而卒

陶氏夏復初妻復初亾氏年二十七子益尚在襁褓



僅遺瘠田十畝躬耕以養舅姑崇禎十四年旱蝗蝗獨不食陶氏禾也是年冬舅病思得羊羹解衣市肉以進致無裕服禦寒故終身抱寒疾子益以貧故棄儒業醫乃嚴課其孫潤力學知名黌序陶年八十九卒曾孫期成亦邑庠生

郁氏年十八歸秦玠生子日昌未暮玠入京遇盜死于途後母弟爭產構難又罹倭寇郁獨身周旋其間堅忍撫孤歷七十一年教子孫成立享年九十二而卒

上海縣志

卷之十

三

劉女

張氏湯侍泉妻年十九而寡伯氏逐之改嫁以死拒之養姑撫子年六十三卒

杭氏顏尚忠妻夫亡無子苦節終身前令任辰旦立石表其墓道

儲氏施龍妻夫亡遺孤敬萱妻顧氏俱年未三十守節終其身鄉黨賢之 十七保人

王氏奚養元妻年二十七夫亡苦節撫孤年八十七而卒

曹氏居順宇妻自二十九歲喪夫守節至九十二歲



預知亡期沐浴更衣危坐集三黨永訣而逝

吳氏太學生葉紹龍妻年二十二夫亡無子撫猶子  
爲子教養倍至苦守四十年卒

施氏庠生華一鳴妻婚一月而夫亾氏毀容堅守營  
葬舅姑及夫三喪成禮苦節四十六年如一日云  
陸氏三林塘人儒士儲重美妻生一子甫六歲重美  
歿陸年二十有五孝舅姑撫孤子力舉八喪致哀  
盡禮守節四十九年而卒子國禎孫才俱力學有  
名不負母訓云

上海縣志

卷之十

嘉列女

蔡氏儒士徐儼妻年二十六夫亾苦守三十五年稱  
完節云

余氏朱敬竹妻年二十七夫死遺二子一女遭外侮  
挈孤嫗寃得雪享年七十有六長子光祖以哀毀  
卒妻亦余氏生子之釵早世媳程氏生子士煥方  
二齡痛夫喪子幼誓以身殉姑泣諭乃止教士煥  
成名又光祖女弟適余朝聖光祖女適余泰宥皆  
年未三十夫死歸母家守節計朱氏一門有五節  
婦三代同居未曾析產人稱爲節義云



高氏朱世榮妻吳氏朱世卿妻俱年未三十而夫歿  
妯娌同心守節撫孤成立臺使邑令益旌其門  
潘氏故宦陸明揚之妾也明揚艱嗣娶之連舉三子  
而夫卒潘矢志撫孤享年九十一而歿前令朱光  
輝旌曰德門貞壽人以為實錄孫鳴夏等皆知名  
姚氏孫可進妻自二十九歲守節享年八十七而終  
明崇禎時按察使凌義渠旌其門

張氏文學朱在瀛妻婚三年在瀛病故張年甫二十  
也撫孤與梓布衣蔬食坐臥慈雲樓足跡未嘗履  
上海縣志

卷之十

列女

地享年六十一而終宗黨稱為全節  
杜氏文學唐子諒妻夫亾無子誓以身殉其祖母伺  
防之得不死後防者稍懈杜遂自經及家人驚拯  
已殞絕矣遠近哀之

方氏正學十世女孫也歸文學袁蕃生三子而蕃歿  
方泣血撫孤竭力教育凡二十餘年子燾荃俱知  
名譽序璿成辛丑進士

王氏朱可忠妻唐氏其妾也唐生一子家宰甫恭可  
忠卒時王年二十九唐年僅十九耳同心守節撫



孤成立延朱宗祀不絕邑廩生鑑卽兩節婦曾孫也

陳氏何尙仁妻生一子一女夫亾家益貧落陳晝耕夜績連舉舅姑及夫三喪娶婦嫁女課孫士璿力學爲諸生苦節四十七載享年七十三卒

汪氏老廉陳肇元妻肇元蒙外祖張姓領鄉薦入都疏復原姓張氏聞之怒甚立逐汪出僦別館以居而待張益厚張亦感悟未幾肇元卒汪氏奉姑撫孤晝夜辟績爲生計苦節四十餘年子裕爲諸生

上海縣志

卷之十

墓列女

有孝行多著述遠近稱賢歿後里人私以孝介謚之

何氏喬以韶妻順治二年八月避亂至母家遇游兵掠之縛馬後至肇嘉浜奮身赴水死時年十九

徐氏邑庠生閔栻妻年二十四夫亾碎首搥心誓從泉壤家人勸謂存孤義重未可捐軀也乃撫孤子峻成名苦節三十八年如一日康熙六年 贈孀

人十九年又 贈宜人

閔氏文學葉光龍妻年二十八而寡上侍翁姑下教



諸子言動以禮享年八十五卒郡邑命旌其門  
潘氏年十六歸諸振兮逾年夫歿舅姑憐其年少無  
子諷令改適潘矢志堅守三十七年卒全其節  
施氏年十八歸徐維生甫二載夫亾翁姑貧老族有  
謀奪志者氏截髮剔面斷一指以死自誓竭力紡  
繡葬三世喪有數白鶴遶墓悲鳴三晝夜明季亂  
民焚劫指氏廬曰此節婦居也引去教子成立年  
六十三臨歿命止以麻衣殮貯邑令屢旌之

張氏金巨卿妻

上海縣志

卷之十

五

列女

梁氏龔孟夔妻

朱氏喬炳文妻

方氏楊會心妻

沈氏喬承宗妻萬曆二十九年巡按御史馬

給匾

旌表

陸氏姚錫祉妻

陳氏俞海峯妻

胡氏生員姚煒妻天啓元年巡按御史趙綬旌其門

曰節重千秋



裁氏喬揚孫妻

王氏高維岳妻

丁氏生員徐奎生妻

年二十四夫歿無子誓以身殉父母泣阻之苦節四十餘年卒各憲交旌其門

徐氏朱有智妻

潘氏唐之益妻

張氏陸伯達妻

張氏陶愷妻

嚴氏陸含淳妻

俞氏閔君卿妻

上海縣志

卷之十

三

列女

姚氏周元浩妻

金氏王達妻

張氏生員喬從毅妻

嚴氏夏旭初妻

喬氏生員龔至欽妻

張氏唐植慧妻

張氏周萼懷妻

黃氏周仁甫妻

沈氏張雲蛟妻



倪氏黃有章妻

陶氏俞維賢妻

喬氏趙錫祚妻

丁氏何永言妻

沈氏生員顧翔妻

王氏廕中書舍人徐爾斗妻順治十一年巡按都御

史周 旌其門曰冰清玉映

沈氏瞿之璧妻

姚氏趙國紳妻

上海縣志

卷之十

百五 列女

潘氏生員張嗣錫妻

趙氏太學生吳道弘妻

朱氏彭爾升妻

張氏徐文熾妻

鄔氏龔穎達妻

高氏生員杜爾柔妻

程氏洪功臣妻

吳氏俞綱妻

趙氏秦少山妻



沈氏侯逢嘉妻

姚氏朱與枚妻

全氏凌彥林妻

王氏馬淘妻

龔氏丁國祚妻

程氏儒士張斗南之室二十八歲夫歿時海寇頻驚骸柩摩托程隻手營葬遺子旦兮甫肆齡撫孤教育子遵母訓苦志誦讀克敦孝義縣報撫憲聘爲義學師守志三十五載白首全貞撫院學院

上海縣志

卷之十

列女

題請建坊旌表

范氏張旦兮之妻卽節婦程氏媳也事孀母孀姑以孝謹聞旦兮館穀於外范與幼女獨居康熙乙丑六月初九夜隣賊潘成挾利刃穴壁而入以威逼姦范義不受辱峻拒大罵成以刃亂下洞胸穿腹立時殞命遍體刀痕成迹至浦濱時雷雨大作終不得路復歸爲隣人所擒伏法縣評撫院學院題請建坊旌獎郡邑士大夫皆賦詩輓之縣特建祠

樹碑永表姑媳節烈



胡氏吳尚聘妻二十八歲夫客死子兆友甫生三月始病割股肉以愈之嗣後隻身營窀穸訓兆友能成人享年六十四

石氏范子咸妻卽烈婦范氏母也二十九歲夫沒遺子恒若甫六歲寤寤苦守日勤紡織孝敬翁姑和睦妯娌撫孤訓誨子克盡孝嫁娶成禮母兼父職守節三十一年茹素終身芳名畢世縣詳旌表

胡氏顧汝信妻年二十三夫亡子天漢在襁褓家貧勤紡績事舅姑生養死葬咸盡禮教子以醫名於

時苦節數十年如一日 督學張廷樞

題請建坊旌表

張氏陸天爵妻二十四歲夫沒子士璋甫乙歲寤寤苦守日勤紡織孝敬翁姑生養死葬撫孤訓誨克敦孝義婚娶成禮母兼父職守志數十年如一日縣詳旌表

氏廩生張來妻名世曾孫也年二十四夫亡欲殉父母勸阻謂子方一歲氏就義撫孤針指營食號露香園顧繡崇禎末年有賊匿孤氏泣惟先六脉



脫珥贖之教子燧文藝精絕子報以孝完節四十六年

朱氏張燧妻顧氏媳也青年早寡兩孤在襁褓勤績力撫淒風苦雨食貧無怨相夫敬姑克盡孝道祀禮無怠俾子就塾苦節四十餘年如一日云旌有一門雙節兩代筠操諸額



仙釋

宋

鰕子和尚名智儼居靜安寺七月十五日村郭設會  
寺僧赴請殆盡惟儼在寺有胥村人來寺齋僧因  
請同往齋所舟行見捕鰕者儼從買一斗索水啖  
之謂漁者曰齋回還汝錢至齋家令席地一飯而  
無觀錢及還漁者索錢儼徐云還汝鰕復索水飲  
隨吐活鰕盈斗人始異之將示寂歛蒲草爲萬餘  
繩懸諸廊廡曰吾將作大緣事卽坐蛻人競施錢  
上海縣志

卷之十

仙釋

懸之繩繩皆滿遂建佛閣今靜安寺猶稱鰕子道  
場

元

德林東甌人至正十三年禪坐上海之柘澤廢寺饑  
寒弗嬰其心越歲夏五月忽語人曰疇能施我一  
龕九月一日將此色身焚却人未之信至期市薪  
繞龕趺坐其內合掌說偈竟火自身起觀者始矍  
然膜拜云

明



原真字用藏姓朱氏上海人得度于華亭興聖寺戒  
行高潔明洪武十八年微疾浴已書偈曰四十二  
年無作無修有生有滅大海一漚真歸無歸心空  
淨遊趺坐而寂

紹宗字一原號遂初上海陳氏子年十三出家里之  
安國寺戒行精嚴洪武中應召有事廬山奏對稱  
旨賜金縷僧伽黎等服擢右講經陞右善世一日  
端坐而化敕遣中使致祭會者數千人其徒奉舍  
利遺骨塔于安國寺

上海縣志

卷之十

三六 仙釋

善信號無疑蘇州嘉定人俗姓吳年二十九出家禮  
上海施水菴僧智德爲師不識字一日索浴入龕  
歛然火起自焚其身寺僧爲起塔繪像

朱蒲包者上海界浜沈氏僕也十八爲寶山募兵行  
遊遇異人授藥一丸擘擘有光服之覺腹中熱氣  
騰湧遂不覺寒暑饑渴身衣破衲冒以蒲包飲之  
酒輒醉醉輒笑臥當街人呼蒲包仙云朱行必挾  
竹四竿夜宿植竹於途不施苫露臥其中大雨  
無沾濕霜雪裂膚鼻息勦如也市人釀酒敗朱



竹攪瓮輒變為葺夏月裸坐赤日中不浴而淨冬  
月河冰合以竹敲冰水輒解裸坐水底振衣而起  
生平不為人談禍福或無意吐一語必奇斤後無  
疾而化

